

Kajeno Lena Lengolo

Lena Le Etsahetse



Tswang le sa eme, ha le rata, re sa inamisa dihlooho tsa rona bakeng sa lentswe la thapelo.

² Ntate ya Mahodimong ya ratehang, re motlotlo bosiuong bona ka hona, monyetla o mong wa ho tla le ho hlahisa Evangedi ena e tlotlehang, e babatsehang ya Morena Jesu Kreste. Re O leboha hoba E sa le yena maobane, kajeno, le ka ho sa feleng. Re O leboha ka baka la batho bana ba bokaneng mona nakong ena ya bosu bona bo batang, mme leha ho le jwalo ditebello tsa bona di kgolo, ba tadimile, ka tumelo ya hore re tla fuwa ntho e nngwe e tlodisang e tswang ho Modimo. Re tla ka tshepo eo, Morena, kopanong e nngwe le e nngwe. Re O leboha ka ditshebetso, bosiuong ba maoba, Tabernakeleng; ho O leboha ka tshebeletso mona maobane mantsiboya, le ka tshebeletso kajeno, Tabernakeleng. Re tadimile pele jwale seo O tla re tlisetsa sona bosiuong bona.

³ Ntate, re a tseba motho ya kgonang ho tsamaisa matsoho a hae a ka phetla maqephe a Bibe, empa ho na le a le Mong feela Ya ka E phedisang le ho e tiisa, mme ke Wena. Mme, Ntate, re tadimile Wena ho phetha hoo bosiuong bona. Re hlonolofatse ka tsela e nngwe le e nngwe. Dipelo tsa rona di tletse thabo ha re bona nako e ntse atamela ya ho kopana le Yena, sefahleho le sefahleho, Yena eo re mo ratileng le ho mo phelela dilemo tsena tsohle.

⁴ Meya e metjha e mengata, Morena, e entswe. Re utlwile hore sehlopha se seholo, mashome a mane kapa a mahlano, se tla kolobetswa ka Lebitso la Hao, hoseng, ho tswa tshebeletsong ya bosiu ba maobane. Oho Modimo, tswela pele hle, re a rapela, ho fihlela Peo e nngwe le e nngwe ya Modimo e rerilweng pele e bona Lesedi la Evangedi, mme e kene mohlapeng.

⁵ Re O kopa bosiuong bona ho re pata ka mora Lentswe; re foufaletse dintho tsa lefatshe, mme re ke re bone Jesu. A ho ke ho hlahle boiphihlelo ba Thaba ya Phetolelo pakeng tsa rona, bosiuong, re tle re se bone motho haese Jesu feela. Re e kopa ka Lebitso la Hae, le bakeng sa tlotliso ya Hae le netefatsong ya Evangedi ya Hae. Amen.

Le ka dula fatshe.

⁶ Ke tla suthisetsa maeke ona, kapa deske ena, lehlakoreng ho se hokae, haeba ho itoketse, ke tle ke kgone ho bona mahlakore bobedi a mokgupi. Kea kgolwa nka lokisa dimaeke tsena mona hantle. Ho lokile, motsotso feela.

7 Re dumedisa, ho tswa holong e kgolo mona bosiu, metswalle ya rona Arizona, California, Texas, le ho phatlalla le Dinaha tse Kopaneng, ka tsela ya mohala. Ntho ena, e finyella matjhabeng ka bophara, tshebeletso ena bosiu bona, ka tsela ya mohala, ka baka leo re tshepa ha Modimo o tla re hlonolofatsa.

8 Na le kgona ho utlwa, morao kwana ho—ho holo ka ho le letshehadi? Ke hantle, ba tla hlahloba tsamaiso ena ya mohala, ho bona hore e sebetse hantle.

9 Motho e mong le e mong o thabile bosiu boo? [Phutheho, “Amen.”—Mongodi.] Be, ho hotle! Ka lehlakoreng lee teng? [“Amen.”] Amen. Ke thabetse jwang ho le bona le dutse bohle ka boiketlo.

10 Mme jwale hosane bosiu, haeba matshwele a ntse a eketseha, ho tla ba le mohala o otlolohileng hape. O teng bosiu bona. Ke kgolwa hore e meng e teng tlase Tabernakeleng.

11 Mme, hosane hoseng, ditshebeletso di ke ke tsa ba Tabernakeleng, hobane . . . ho tla ba le mohlophisi wa dipalesa mono ho kgabisa kereke mokete wa lenyalo thapameng ya hosane. Mme ba fetiseditse di—ditshebeletso, hoseng, hodimo kerekeng ya Moena Ruddell, e mong wa batlatsi ba rona, e leng hodimo kwana e—e mmileng o moholo mona, mashome a tsheletseng a metso e mmedi. Na ho tsebisitswe? [Moena Neville o re, “E.”—Mong.] Ho tsebisitswe. Mme, haeba ho phophoma mono, re tla nka ba setseng mme re romele moreri e mong tlase ha Moena Junior Jackson, tlase Clarksville. Lebaka le entseng hore re e tshwarele ha Moena Ruddell, ho haufi mona, mme re ka . . . mme re hopola hore ho tla re bebofalla. Mme re tla e lokisa ka mokgwa o itseng. Mme le etse bonnete ba ho phetha dikolobetso tsohle tsa hosane, mme ke tshepa hore ho tla ba le lekgolo le leng kapa a mabedi a ekeletswang ho bao bakeng sa kolobetso hosane. Mme jwale hosane bosiu . . .

12 Ha ke rate ho tsebisa ntho eo ke buang ka yona pele ho nako, empa bosiu bo bong tshebeletsong, kapa ka tsatsi le leng, ke batla ho bua ka temana ya: *Melkisedeke Enwa Ke Mang?* Hobane, ke—ke temana eo ke nahanang hore re phela mehleng eo ditshenolo tsena, tseo esale di botsisiswa ho theosa le mengwaha, hore, “Motho Enwa Ke Mang?” Mme ke kgolwa hore Modimo o na le karabo, hore E ne e le Mang. Ba bang ba itse, “ke boprista,” bang ba itse, “morena,” ba bang. . . . Empa ho loketse . . .

13 Ha feela ho e-na le potso, karabo e nepahetseng e loketse ho ba teng, potsong eo. Ho ke ke ha ba le potso pele karabo e-ba teng.

14 Jwale, re a tshepa Modimo o tla re abela lehlohonolo bosiu bona ho tswa Lentsweng la Hae, re sa Le bala.

15 Mme le bile le . . . Billy o nkopile ho le bolella hore le bile le tshebedisano e ntle ruri le batho bana mona ba neng ba laola boema-koloi, le mapolesa le ntho e nngwe le e nngwe. Le tshware jwalo; ke ntho e ntle, e ntle haholo.

16 Re tshepile ho bona nako, mohlomong haufi tsamaong ya nako, mohlomong mohla re ka tlisang tente motseng mona re e hlome ka ntle mono lebaleng la bolo, moo re ka dulang nako e teletsana, diveke tse ka bang tharo kapa nne, tsoseletso, ka nako tsohle. Athe mona re sa qala feela ho tsebana, eba re se re lokela ho le sadisa hantle mme re tsamaye hape. Empa ke rata ho tla le ho dula leeto le le lelele, nako e nngwe moo o ka dulang o sa lokela ho kwala bosiu bo le bong kapa a mabedi, empa ho dula mme o ruta, motsheare le bosiu, motsheare le bosiu, jwalo le jwalo. Mohlomong motho a ye hae mme a fepe dikgoho, ho hama dikgomo, mme a kgutle veke e latelang le ho tswella ka ditshebeletso. Ke—ke rata seo. Ka hona Morena a be le lona.

17 Jwale, pele ke tsamaya, mohlomong Sontaha hoseng kapa Sontaha bosiu, kapa ho hong, ho e nngwe ya ditshebeletso tsena, ke a tseba bohle le emetse ho utlwa Molaetsa ka Nnete ya *Lenyalo Le Tlhalano*, e leng bo bong ba mathata a maholo a letsatsi. Mme ke kgodisehile jwaloka ha ke eme mona, ke dumela hore karabo e nepahetseng e teng Lentsweng la Modimo, mme ke dumela hore ke sona seo ke tshepisang ho kgutla ka baka la sona.

18 Mme ke lekanya hore, tsepong, ho ya kamoo ke tsebang, ke batla ho tshwara tsebeletso e nngwe mona Jeffersonville, ka Sontaha sa Paseka, mme re tla . . . tsebeletsong ya ha tsatsi le tjhaba, mme hape le Sontaha sa Paseka. Ka hona re tla e tsebisa pele ho nako mme re leke ho fumana holo e kgolo, ha ho kgoneha, kapa sebakeng se seng, bakeng sa Sontaha, mohlomong ho tla Moqebelo le Sontaha. Ke loketse ho fofa ke kena le ho tswa hape, hoba nako e atametse . . . Ke loketse ho e sheba, pele, hlophisong ya maeto eo ke nang le yona, le e nngwe ya dibuka tsa ka—tsa ka—tsa ka tsa maeto California. Mme hape, hang ka morao ho moo, ke loketse ho thehela kwana—kwana Afrika. Kahoo dulang le theile tsebe mme le re rapelleng.

19 Jwale, bosiu bona, ke batla ho tlisa maikutlo a lona karolong ya Lentswe la Modimo, e fumanwang kgaolong ya 4 ya Mohalaledi Luke. Kgaolo ya bone le temana ya 16, e tla qala teng, ke Jesu ya buang.

. . . *Kajeno Lentswe leo le etsahetse le ikutlwela.*

20 Jwale re batla ho ntsha, Mono, kakaretso ya kamoo Lentswe la Modimo leng matla kateng! Jwale, rona bohle re ka akanya motjhini, empa ho batleha Matla ho etsa hore O sebetse.

21 Re ka rala seo dihloomo tsa motjhini di leng sona, koloi, empa he ho batlahala matla ho etsa hore mabidi a qale ho sebetsa le ho tsamaya.

22 Jwale, Jesu o ne a kgutletse teng—teng Nazaretha, moo A holetseng teng. Ho ella tlase kwana Lengolong mona, re fumana moo ba itseng, “Re utlwile O entse *hore-le-hore* kwana Kapernauma. Jwale re ke re O bone o ho etsa mona naheng ya Heno ka Sebele.”

23 Jesu a re, “Ha—ho moporofeta ya amohelwang naheng ya habo.” Mme, ehlile, ke tulong eo o holetseng teng, le moo batho ba o tsebang. Mme moo O ne a—a—a na le lebitso le lebe, le ho qala, ka kaba la ho tswalwa ha Hae ho se ntate wa lefatsheng. Ba ne ba Mo bitsa “ngwana bonyatsi,” hore hantle—ntle Maria o emere le pele a nyalwa, semolao, ke Josefa. Empa, ha ho jwalo, re a tseba ha ho jwalo.

24 Mme Lengolong lena, se entseng mahlo a ka a wele tabeng ena, ke ntho e sa tswa hlaha Phoenix, Arizona. E le tsatsi la ho qetela, la tshebeletso eo ke neng ke tla bua ho yona Sebokeng sa Matjhaba sa Borakgwebo Ba Evangedi E Tletseng.

25 Mme sebokeng sena ho ne ho e-na le moeti ya na re etetse, eo e neng e le mobishopo wa Katolike, e leng, ke wa “the Chaldean Rites of the Apostolic Catholic Church; the Most Rev. John S. Stanley, O.S.D.” Ke “arekabishopo ya metse e matahaneng ya Dinaha tse Kopaneng,” kerekeng ya Katolike. *Ena* e ne e le setlankana sa hae le aterese ya—ya hae.

26 Mme e le moeti wa Borakgwebo ba Bakreste, mme ke ne ke ile ka mmona ka mono, letsatsi pele. Mme ha nke ntse ke bua Moqebelo bosiu, ke a kgolwa e ne e le mohlang oo, kapa Moqebelo hoseng dijong tsa hoseng, mme ke . . . Ha ke ntse ke bua, a nna a ntjheba. Ka nahana, “Ruri monna eo o hanana le ntho e nngwe le e nngwe eo ke e buang.” Mme, o a tseba, o n’o—o n’o ka mmona feela; o ne a riba-riba ka hlooho, empa ke sa tsebe hantle ntho e neng e mo kgwebetha.

27 Ka baka leo thapama ya Sontaha, eitse ha ke ema ho bua, ke tla nka sehlooho sa ka hodima *Mahlaba A Pelehi*, moo Jesu a boletseng, hore, “Jwaloka ha mosadi a fehelwa pelehing ka ngwana,” o fehelwa pelehing. Mme ha ho le jwalo ke tla bua ho tswa mono, e le, *Mahlaba A Pelehi*, mokotaba, ke re lefatshe le mahlabeng a pelehi jwale. La kgale le loketse ho feta, le letjha le tle le tswalwe; jwalo feela ka—ka ha peo e loketse ho bola, e tle e hlahise bophelo bo botjha.

28 Le kamoo mahlaba, mahlaba a pelehi a hlathileng lefatshe! Ntweng ya Pele ya Lefatshe, le bile le mahlaba a nyarosang, hoba ba ne ba e-na le gase e tjhefo, le tse jwalo, tse neng di ka timeletsa lefatshe. Mme Ntweng ya Bobedi ya Lefatshe, la tshwarwa ke a mang, lehlaba le matlanyana; ba ne ba e-na le dithuhaki, hape le bomo ya atomo. Le ka se hlale le mamella

lehlaba le leng hape la mokgathala. Ka dimisale le dintho kajeno, ntwana e nngwe hape e tla le tswibilela seabakeng, hobane jwale le tla be le lokollotswe. Mme ho tla ba le Lefatshe le Letjha. Bible e boletse le tla ba teng.

²⁹ Tlase Molaetsa wa moporofeta ka mong, Iseraele ya tshwarwa ke lehlaba la pelehi, ka hobane baporofeta bana ba fihla temeng ka mora hoba baithuti ba thutamodimo le baruti ba kenye kereke sebopehong sohle sa mokgatlo. Mme ereha baporofeta bao ba hlahella temeng ka HO RIALO MORENA, ba ne ba kgohlopa dikereke tseo, mme e tshwarwe ke lehlaba la pelehi. Qetellong, ya tshwarwa ke lehlaba la pelehi ho fihlela e tswetse Mora wa Evangedi, eo e neng e le Lentswe le entsweng nama ka BoLona.

³⁰ Ka baka leo ruri kereke e mahlabeng a pelehi bosiuong bona, hape, bakeng sa tokollo ya Mora, Mora Modimo ho tla hape. Baithuti bohle ba rona ba thutamodimo, ditsamiso tsohle tsa rona, phutheho tsohle tsa rona tse mabitso, di bodile tlase rona hantle. Ka baka leo re mahlabeng a pelehi, mme Molaetsa o tswang ho Modimo o dihela kereke mahlabeng a boima ho feta, empa ka morao ho nakwana e tla hlahisa Monyaduwa. Ya tla kgutlisetsa Jesu Krete ho Monyaduwa wa Hae.

³¹ Mme, hape, ka nahana ka monna enwa ya hananeng le nna hakaana. Yaba ke a ema ho rera Molaetsa wona, ka phetla Bibeleng ya ka, ho fumana leqephe.

³² Mme mosadi waka a sa tswa mpha Bible e ntjha, bakeng sa Kresemose. Bible yaka ya kgale e se e na le dilemo tse leshome le metso e mehlano, mme ntho eo e se e batla e le matamuke. Maqephe, nako le nako ha ke ne ke a phetla, a fefohe a tswe ho yona. Mme, empa ke tseba hantle feela moo Lengolo le le neng le fumanwang teng, ka hona ke badisisa haholo Bibeleng eo. Mme ke sa tswa nka e ntjha, hoba e nngwe e ne e bonahala e qhanqhane, ho ya ka yona kerekeng.

³³ Mme eitse ha qala ho phetla ho Mohalaledi Johanne, moo Lengolo le neng le fumanwa teng, ka qala ka bala kgaolo ya 16, mme temana eo ke neng ke e batla e le siyo. Ka baka leo ke nahane, “Ho a makatsa!” Ka phetla hape; le jwale e sa le siyo.

³⁴ Mme Moena Jack Moore, ho tswa Shreveport, Louisiana, motswalle waka e moholo, a dutse mono. Ka re, “Moena Jack, na hoo ha ho fumanwe ho Mohalaledi Johanne 16?”

A re, “E.”

³⁵ Mme moperesita enwa wa Mokatolike a ema setulong sa hae, hara baruti ba ka bang lekgolo kalaneng; a tsamaela haufi le nna, ka dipurapera tsa hae tsohle le diphekga le difapano, le tse jwalo, mme a ema hantle pela ka. Mme a re, “Mora, tiya matla. Modimo o makgatheng a ho nka kgato.”

Ka nahana, “Mobishopo wa Katolike o mpoella taba eo?”

A re, “Le bale Bukeng ya ka.”

³⁶ Mme ka bala Lengolo Bukeng ya hae, mme ka nka sehlooho sa ka ka tswella, ho rera thero ya ka.

³⁷ Hamorao, hoba ke qete, a ema hoba ke tsamaye, mme a re, “Ho na le ntho e le nngwe e loketseng ho etsahala. Ka mora moo, kereke e loketse ho tswa ditshileng tseo e leng hara tsona, kapa rona re loketse ho tswa ditshileng tseo kereke e leng ho tsona.” Ka baka leo, e nngwe ya tsona.

³⁸ Mme ke se ke le tseleng e yang hae, ke kgutlela tlase Tucson, ntsiboyeng leo. Bana ba llela sementjhisi, mme ka emisa ho fumana sementjhisi lephephenyaneng. Mme mosadi waka a re, “Bill, ha ke eso ka ke tshoha jwalo bophelong bohle ba ka, ho o bona o eme hodimo mono o fata-fata Bibeleng eo.” Ho re, “Na ntho eo ha e a ka ya o ferekanya?”

³⁹ Ka re, “Lekgale.” Ka re, “Ke tsebile le teng kae-kae mono. Ba mpa ba sa kenya leqephe leo. Ke phoso ya kgatiso.”

⁴⁰ Mme a re, “Ho nahana, hore ke o file Bible eo! Yaka mahlo wohle ka mono a ne a ntjametse.”

⁴¹ Mme ka re, “E bo, ha se taba ya hao. Ebile kgatiso e phoso Bibeleng.” Ka re, “Ba mpa feela ba sa kenya leqephe leo ho hang.”

⁴² E, ka theosa mme ka e sheba hape, ka ho phethala kamoo ho neng ho ka etswa; empa kgaolo ya 16 e fella, sekoto, sekoto sa yona feela se di-intshi tse ka bang tharo ho tloha fatshe, ka kwana ka kgaolong ya 17 ka lehlakoreng le leng, e etsa yona ntho eo. Mme, kaha e ne e le Bible e ntjha, maqephe a mabedi ao a kgomarelane ka botlalo, mme ke ne ke bala kgaolong ya 17 bakeng sa ya 16. “Tjhe,” ka rialo, “ho itoketse. Ke ka morero o itseng.”

⁴³ Mme ka ho hlaka feela jwaloka ha o ka utlwa lentswe lefe kapa lefe, Lentswe la tla ho nna, le ho re, “A fihla Nazaretha, moo A holetseng teng; le ho kena sinagogeng, ka mokgwa wa Hae. Yaba moprista o Mo nea Mangolo ho bala, mme A bala Esaia 61. Mme eitse hobane A bale Mangolo, A dula fatshe; a busetsa Bible ho moprista, Buka, le ho dula fatshe. Mahlo a phutheho yohle a nna a tadima Yena. Mme Mantswe a molemo a tswa molomong wa Hae. Yaba O re, “Kajeno lena Lengolo lena le etsahetse.”

“Kajeno lena Lengolo lena le etsahetse.”

⁴⁴ Kamoo Lengolo le tsepameng kateng! Ha le ka lemoha mona ke ho Esaia 61:1 ho ya ho 2, ke hona moo Morena wa rona a neng a bala teng, Esaia 61:1 ho ya ho 2. Empa pakeng tsa temana ya 2 ya Esaia 61, A thola. Moo e itseng, “Moya wa Morena o ho Nna; ho bolela selemo se molemo,” yaba O a thola. Hobane’ng? Sekoto se seng, ho tlisa kahlolo, se ne se sa lokela ho tla ha Hae la pele, empa ho Kgutla ha Hae la bobedi.

Le a bona, se sa lokela mono. Kamoo Mangolo a sa foseng le ka mohla! Kamehla a phethahetse. Jesu o ile a thola hantle feela moo Lengolo le thotseng, hoba ka nepo ke hona ho n'o tla netefatswa tsatsing la Hae, jwale, ho tlang hoo la ho qala. Ho Kgutleng la bobedi O tla tlisa kahlolo hodima lefatshe; empa e ke ke ya ba nakong eo. O ne a tla "bolela selemo se molemo."

⁴⁵ Lemohang Messia ya emeng kalaneng, ho Itsebisa ka Lentswe la tshepiso bakeng sa mongwaha oo. Ho makatsa ha kakang, Messia a ema pela kereke! Mme bonang Mantswe ana a molemo, ha A n'a re mona, "Ho bolela selemo se molemo."

⁴⁶ "Selemo se molemo," jwaloka ha re tseba bohle, jwaleka babadi ba Bibehe, e ne e le "selemo sa tokoloho ya makgoba." Ke hore, mohla makgoba wohle le batshwaruwa, ka mokgwa wa bona, ba neng ba beilwe, ditlamong; mme ba loketse ho nehela mora, ho lefa molato; kapa moradi, ho lefa molato, [Sekgeo lebanteng—Mong.] mme ba le bokgobeng. Ho sa tsotelehe ba bile ditlamong nako e kae, kapa ba loketse ho dula nako e kae mono; ha selemo seo se thwasa, sa tokollo ya makgoba, ha terompeta e ne e lla, motho ka mong a ka lokoloha ha a ne a batla ho lokoloha. [Sekgeo lebanteng—Mong.] O lokolohile. Ha o sa hlola o le lekgoba.

⁴⁷ Empa ha o n'o rata ho dula o le lekgoba, jwale o n'o loketse ho iswa tempeleng, o eme pela motheo wa tempele, mme ba nke tsenene mme ba o phunye lesoba tsebeng ya hao, mme jwale o n'o loketse ho sebeletsa mong a makgoba matsatsi wohle a hao.

⁴⁸ Ke mohlala o phethahetseng jwang wa Evangedi ya Jesu Krete! Ha E bolelwa, sehla se molemo, le nako ya Jubile; mang le mang, ho sa natse o mang, o mmala ofe, o setho sa phutheho efe e lebitso, hore o tebile hakae sebeng, kapa se phoso ka wena ke eng; o ka lokoloha ha o utlwa modumo wa terompeta ya Evangedi o utlwahatswa. O lokolotswe!

⁴⁹ Empa ha o furalla Molaetsa, mme o hana ho O utlwa, lemoha, o no phungwa tsebe, ka tsenene. Hoo ho bolela, ho re, o tshetse mola o pakeng tsa mohau le kahlolo, mme o ke ke wa hlola o utlwa Evangedi hape. O ke ke wa hlola o tswela pele. O tshwanetse ho fetoha lekgoba la tsamaiso eo o leng ho yona, matsatsi ohle a hao, ha o hana ho utlwa selemo se molemo.

⁵⁰ Jwale, karolo e nngwe ya lona, kamoo ke boletseng, e ne e sa lokela ho arabjwa, hoba Messia enwa ya tlang, nakong ya jwale, ke mohla A tla tlisa kahlolo.

⁵¹ Jwale, batho bao ba hlotswe ke'ng ho bona hore E ne e le Mang? Ba e fositse jwang le ka mohla? Ho etsahetse jwang, hodima e ne e tsebahaditswe ka ho hlaka le ho bontshwa? Ba ne ba ka hloleha jwang ho bona? Hodima A. . .

⁵² Lentswe le le kakang! E nahaneng, "Kajeno lona Lengolo lona le etsahetse mahlolong a lona." Ke mang ya e boletseng? Modimo ka BoYena, Oo e leng motoloki wa Lentswe

la Hae ka BoYena. “Kajeno lena Lengolo lena le etsahetse.” Messia, ka BoYena, a eme pontsheng ya phutheho mme a bala Lentswe Bibeleng, le buang ka Yena, ho nto thwe, “Tsatsi lena Lengolo lena le etsahetse,” mme le jwale ba hloleha ho le bona.

⁵³ Ekaba tlokotsi e kakang, empa e etsahetse. E hlahile ha ngata. E ne e ka etsahala jwang? Ehilile, jwaloka ha e etsahetse mehlang e meng, ka ho dumela boithalasetso ba motho ba Lentswe. Ke sona se bakileng hona. Badumedi bao ba matsatsi ao, bao ho thweng ke badumedi, ba ne ba amohela tlhaloso ya seo moprista a se boletseng ka Lengolo. Ka hona Jesu, ka ho se be wa diemo tsa bona kapa mokgatlo wa bona, O ile a kgaolwa sebokeng sa bona.

⁵⁴ Mme, ka baka leo, ba sa batle ho Mo amahanya le bona, hoba A ne a fapohile ho bona. Botho ba Jesu Krete bo ne bo qoholehile hoo motho a ne a sa tlameha ho fosa ho bona hore eo e ne e le Mora Modimo, hoba E ne e le ponahatso e phethahetseng ya Lengolo le neng le ngodilwe ka Yena.

⁵⁵ Ke kamoo Mokreste a tsebjwang kateng, ha bophelo ba hae bo bontsha tsona dintho tseo Mokreste a lokelang ho di etsa.

⁵⁶ Kamoo A neng a ka ema mono le ho re, “Kajeno lena Lengolo lena le etsahetse hantle mahlong a lona!” Ke ntho e ikgethileng hakae, kamoo e hlakileng kateng, mme leha ho le jwalo batho bao ba se ke ba utlwisisa. Hobaneng? Ka hoba ba ile ba nka tlhaloso ya boholo bo itseng ba baprista bao ba neng ba ba utlwa.

⁵⁷ Mme kamehla nalana e a iphetha. Mme Lengolo le tshwere meeelo e mengata ho Lona, le meeelo e mengata ya tshenolo.

⁵⁸ Ho tea mohlala, jwaloka ho boletswe Bibeleng, hore, “Ke bitsitse mora wa ka Egepete,” ho ne ho hopotswe Jesu. Empa bala molathoko wa polelo eo, mme o fumana hape hore, ho ne ho hopotswe Jakobo, Lengolo lona leo. Jesu e ne e le Mora wa Hae e moholo. Jakobo e le mora wa Hae eo A mmitsitseng Egepete, e leng hoo tlhaloso tsa Scofield esita le ditlhaloso tse ding tse fanang ka yona, hoba ke Lengolo leo e ne bua ka lona. Ka baka leo e ne e na le—e na le karabo e menahaneng habedi; ebile le karabo ho bitsweng ha Jakobo, le ho bitsweng ha Jesu.

⁵⁹ Ho a tshwana le kajeno! Ke ka hobane re kene pherekanong e kang eo re leng ho yona, mme batho ba sitwa ho bona Nnete ya Modimo, ke hoba ho e na le hlaloso tse ngata haholo tsa batho ka Lentswe la Modimo. Modimo ha a hloke motho ho toloka Lentswe la Hae. Ke toloko ya Hae ka BoYena.

⁶⁰ Modimo wa re, tshimilohong, “Lesedi le be teng,” mme lesedi la eba teng. Hoo ha ho hloke tlhaloso ya letho.

⁶¹ Wa re, “Morwetsana o tla emola,” mme a emola. Hoo ha ho hloke tlhaloso ya letho.

62 Moo, tlhaloso ya Modimo ya Lentswe la Hae keha A e netefatsa le ho paka hore E jwalo. Ke tlhaloso ya Hae eo, ka ho e phetha. Ke hona moo tlhaloso ya Modimo e leng teng, ke ha A phethahatsa Lentswe la Hae. O le hlaloesetsa Lona.

63 Jwaloka mohlomong lesedi le ne le siyo, mme Wa re, “Lesedi le be teng,” mme la eba teng, hoo ha ho hloke motho ho hlalosa.

64 Empa re Le kopanya le ditsamaiso tse entsweng ke batho, mme, ha le etsa jwalo, le—le Le ntsha motjheng. Haesale ho le jwalo.

65 Empa ke sa nahanne kamoo e neng e tshwanetse ho ba ntho e hlolang kateng. E nahaneng, Messia! Hobaneng ba hlolehile ho Mmona? Hobane, bona baetapele ba bona ba neng ba loketse ho Mo tseba, ba neng ba loketse ba be ba rutehile Lengolo, ba ne ba loketse ba be ba bile le kutlwisiso ya Mangolo, ba nyenyefaditse Monna enwa le hore, “Ke ngwana bonyatsi, ho—ho qala feela. Re ne re ke ke ra dumela Hono.”

66 Dilemo-lemong tse latelang, ha re dumele hono. Re ne re ka shwela morero wa hore E ne e le Mora ya tswetsweng ke morwetsana.

67 Mme ka tsatsi le leng ho tla etsahala hore, tsona dintho tseo re bonang Jehova a di etsa kajeno, batho mengwaheng e tlang, haeba e le teng, ba tla shwela taba eo re buang ka yona kajeno. Le tla lokela ho e etsa mohla letshwao la sebata le fihlang, mme le sa dumellwe ho bolela Evaangedi ka mokgwa wona. Mohla kopano e kgolo ya dikereke e teanang, e leng motjheng jwale bakeng sa kereke ya lefatshe, le tla lokela ho tiisa bopaki ba lona ka bophelo ba lona, nthong Ena.

68 Le tshwanetse ho E dumela e sa le jwale. Hola baprista bao ba ka tsoha, ba Mo ahlotseng, ba ne ba ke ke ba Mo ahlola. “Empa,” o ka re, “hola ke ne ke le teng mono, nkabe ke entse *hore-le-hore*.” Be, oo e ne e se mongwaha wa hao. Empa, wona ke mongwaha wa hao, ena ke nako.

O re, “Tjhe, hola A na le teng mona!”

69 Bible e itse, “Ke Yena maobane, kajeno, le kamehla,” ka ho tshwana, ka baka leo O teng mona. Empa, O teng mona! Ereka lefatshe le hlalefile, le hodile, le rutehile ho feta; O mona ka sebopelo sa Moya, oo ba ke keng ba o bolaya kapa ho timeletsa lefung. O shwele hang; A ke ke a shwa hape. O ne a loketse ho etswa nama Modimo a tle a bolawe nameng, bakeng sa sebe. Empa kgetlong lena O n’a ke ke a shwa le ka mohla; Ke Moya o Halalelang.

70 Jwalo, ho nahana kamoo ba neng ba kwetlile dintho tseo kgahlano le Yena! Ntho e nngwe, O ne a sa batle ho ikopanya le diemo dife feela tsa bona. Jwale he, le a bona, taba eo ya Mo etsa motho e mobe. A sa batle ho ikopanya le mekgatlo ya—ya

bona, a sa batle ho ikopanya le bopritsa ba bona, mme A sa batle ho amana le tsona ho hang. Mme hape, ntle le tseo tsohle, A leka ho heletsa tseo ba di hahileng.

⁷¹ O na kene tempeleng. Re Mmitsa Monna ya bonolo; O ne a le jwalo, empa hangata ha re utlwisise bonolo ke eng.

⁷² E ne e le Monna ya kutlwelo bohloko, empa le ha ho le jwalo ka nako tse ding ha re utlwisise seo kutwelo bohloko e leng sona. E seng qenehelo ya botho, ha se kutlwelo bohloko. Empa, *kutlwelo bohloko*, ke, “ho etsa thato ya Modimo.”

⁷³ O ile a pholletsa le letsha la—la Bethesda, kgoro. Ho ne ho robetse batho, moo matshwele a bona. Matshwele ha se palo e itseng. Empa matshwele a ne a robetse moo; dihole, difofu, diritsa, ba omeletseng ditho. Mme O ne a le kutlwelo-bohloko bathong, kamehla. Mme A ya ho motho e mong ya neng a sa holofala, foufala, ho ritsa, kapa ho omella ditho; mohlomong a ena le bothata ba mokgathala feela, mohlomong a ena le bohloko bo itseng ba kgaello ya ditho. A bile le hono dilemo tse mashome a mararo le metso e robedi. Bo ne bo sa tlo mo tshwenya, e sa tlo mmolaya. A robetse hodima paelete. Mme A re, “Na o rata ho fola na?”

⁷⁴ Yaba monna o re, “Ha ho motho ya nkenyang metsing, e ye e re ke sa ya, be, motho e mong a be a se a nketa pele.” Le a bona, a kgona ho bona, a bona, a kgona ho ya kwana le kwana, a mpa a fokola feela.

⁷⁵ Mme Jesu a re ho yena, “Ema. Nka dipate tsa hao o ye tlung ya hao.” Mme Jesu a botswa ka taba eo, hoba le a hopola Lengolo le boletse hona.

⁷⁶ Ha ho makatse! Haeba A ne a ka tla Jeffersonville bosiuung bona mme a etsa ketso e kang eo, ba ne ba tla nne ba bue ka Yena.

⁷⁷ Empa, hopolang, O tletse ho etsa ntho e le nngwe, e ne e le thato ya Modimo. Jwale, hoo ho fumanwa ho Mohalaledi Johanne 5:19, le tla fumana karabo. O ile a re, “Kannete, nete, Ke re ho lona, Mora o sitwa ho etsa letho a Nnotshi; empa seo Ntate a Mmontshang sona, Mora o se etsa jwalo le yena.”

⁷⁸ Jwale, ba loketse ba be ba tsebile hore eo e ne e le yona netefatso ya boporofeta ba Moshe, “Hoba Morena Modimo wa lona o tla le hlahisetsa Moporofeta ya jwaloka Nna.”

⁷⁹ Na le lemohile, ha A ne a bona monna eo, O itse. . . Jesu o tsebile o bile maemong ao dilemo tse ngata. Le a bona, ka ho ba Moporofeta, O bone monna eo maemong ao; a theohela tlase mono le ho tswedipana—tswedipana a kgeloha batho bao tseleng ya Hae, hara batho bao, a phollela hara bongata, ho fihlela A fumana monna eo ya itseng.

⁸⁰ A feta dihole, diritsa, difofu, le ba ommeng ditho, leha e ne e le Monna ya tletseng kutlwelo-bohloko. Empa, *kutlwelo-bohloko*, ke, “ho etsa thato ya Modimo.”

⁸¹ Jwale, re Mo fumana, A sa batle ho kopana le bona. A sa batle ho etsa letho le diemo tsa bona, yaba O fetoha mokgelo. A sa batle letho la . . .

⁸² Ntle le moo, A kena tempeleng ka tsatsi le leng. Monna a kena ka mono mme a fumana ntlo ya Modimo e batla e silafetse jwaleka tsatsing lena. Ba ne ba reka, ba rekisa, ba ananya ditjhelete. Yaba O phethola ditafole tsa ditjhelete; a nka maratswana a loha hammoho, a shapa ba ananyang ditjhelete a ba ntsha tempeleng. A ba tjamela ka kgalefo, mme a re, “Ho ngodilwe ho thwe,” allelua, “ntlo ya Ntate ke ntlo ya thapelo; athe lona le e entse lehaha la mashodu. Mme lona, ka meetlo ya lona, le entse melao ya Modimo ntho e se nang matla.”

⁸³ Oho, na sekgakgatha se jwalo se ne se ka dumela ho Yena le ka mohla? Tjhe, monghadi. Ba ne ba pitikile-sa-kolobe ha kana reberebeng ya seretse sa disosaiti, le ditshila tsa letsatsi, ho fihlela ba hwamisitswe ke bokereke hoo ba sitilweng ho utlwa ho reketla ha Matla a Modimo o Matlaohle. Ha ho makatse ha mosajana a na ka ama seaparo sa Hae mme a fodiswe ke Hona; mme lesole le tahlilweng le ka tshwela sefahleho sa Hae ntle le ho utlwa matla a letho! Ho itshetlehile kamoo o E atamelang kateng. Ho itshetlehile hodima seo o se batlang. Ha o e ya kerekeng, ho tswa hore o shebileng.

⁸⁴ Jwale re Mmona a eme mono. Ntle le pelaelo batho ba se ba mo laile, ba lauwe, baprista ba laile batho, “Jwale O tla fihla ka Sabatha e tlang, mme, ha A fihla, le se ke le Mo utlwa. Jwale, le ka nna la ya la dula mona, empa le se ke la natsa seo A se bolelang, hoba Eo ha se setho sa hlopha sa rona. Ke mokgelo. Ha a na le setlankana sa botho. Esita A se na le mokg- . . . pampiri ya mokgatlo ho yena. Ha a na letho le kang leo.”

“Ke Mang?”

⁸⁵ “Ke moshanyana mokwenehi ya hlahetseng tlase mona, tswalo ya bonyatsi, tlung ya mmetli, ke hore mmae o Mo emotse pele ba nyalana, mme ba leka ho kwahela hona ka mohlolo o itseng.

⁸⁶ “Re a tseba hore, Messia mohla A tlang, O tla theo ha ka dikgoro tsa Lehodimo a ye ho moprista wa rona e moholo a re, ‘Ke Nna enwa Kaiafa.’” Empa re fumana hore ha A e sebetsa ka mokgwa oo, hoba Lentsweng ho no sa ngolwa ka tsela eo. E le meetlo ya batho e entseng hore ba dumele seo.

⁸⁷ Lentswe le ne le boletse hore O tla tla hantle feela kamoo A tlileng. Mme keha A eme mono, a bala Lentswe, le hore ho

bona, “Kajeno lena Lengolo lena le etsahala mahlong a lona.” Mme le jwale ba sitwa ho Mmona kapa ho Mo elellwa, jwaloka ba entse mengwaheng e meng yohle.

⁸⁸ Noe a ka be a n’a bue sona seo, mohla a kenang arekeng mme monyako o kwalwa. Moshe o na ka phahamisa fensetere eo ka hodima areka, a shebe ka ntle hodima phutheho. . . Hopolang, Modimo wa kwala monyako. Mme o ne a ka re, “Kajeno lena Lengolo lena le etsahetse mahlong a lona,” empa nako e se e ba siile dilemo tse lekgolo le mashome a mabedi, ho leka ho ba kenya sekepang seo a neng a se hahile, a ba bolella hore Lengolo le itse, “HO RIALO MORENA, pula e tla na,” empa ba ile ba ema nako e telele. Empa Noe a ka rialo ha bonolo, “Tsatsing lena, kajeno, Lengolo le etsahetse.”

⁸⁹ Moshe, ka lona tsatsi leo Topallo ya Mollo e neng e theohela hodima Thaba ya Sinai le ho pakela bopaki ba hae, Moshe o ne a ka re, “Kajeno lena Lengolo lena le etsahetse.”

⁹⁰ Moshe, le a tseba, e ne e le monna wa Modimo ya bitsitsweng, moporofeta. Mme pitsong ya hae, kaha e ne e le moporofeta, a loketse ho fumana boiphihlelo bo ka hodima hloleho. Hore e tle e be moporofeta, a loketse ho kopana le Modimo fahleho di tadimane le ho bua le Yena. Mme ntho e nngwe, seo a se boletseng se loketse ho hlaha, ho seng jwalo motho mang kapa mang a ka be a sa mo dumela.

⁹¹ Ka baka leo ha ho motho ya nang le tokelo ya ho ipitsa jwalo pele a buile le Modimo fahleho di tadimane, kwana motsheo lehwatateng sebakeng se seng, moo a kopaneng le Modimo, ka boyena. Mme bahetene bohle lefatsheng ba ke ke ba mo amoha yona ka ho e hlalosa; o ne a le teng mono, o a tseba hore e etsahetse. Mokreste e mong le e mong o loketse ho ba le boiphihlelo boo le pele ba ka bua letho ka ho ba Mokreste. Boiphihlelo ba hao ka sebele!

⁹² Ke qoqile le motswala, nakong e seng kaalo ya ho feta, moshanyana wa Mokatolike, ya itseng, “Malome Bill, ke mathetse kwana le kwana, ke ya hohle, ke leka ho fumana ntho e nngwe.” Bosiu ka mora bosiu, le pele kopano ena e qala, a nts’a lla. Mme hara bosiu, a lore ditoro eka o a kena, a mathela aletareng, moo ho rerwang, mme a etsa maipolelo a hore esale a le phoso.

⁹³ Ka re, “Melvin, ho sa tsotelehe moo o lehang ho ya teng, o ingodisa kerekeng tse kae, ke bo ‘Ahe Maria’ ba bakae o ba bitsang, kapa ke mahlohonolo a makae o a amohelang ho motho, o loketse ho tswalwa la bobedi ke Moya wa Modimo. Ke yona feela ntho e tla kgotsofatsa pelo ya motho.”

⁹⁴ Ke hore, ke a tseba ba fumane phapanyetso, kajeno, ya ho tswala la bobedi, ho dumedisana feela le moreri ka matsoho le ho ngodisa lebitso la hao bukeng. Empa, metswalle, hoo ke tshomo. Ha se Nnete ya Bible. Ha ho no le jwalo, Diketso tsa

Baapostola, kgaolong ya 2, di ka be di baleha jwana, “Tsatsi la Pentekosta ha le se le fihlile, modisa a tswa mme a tshwarana le batho ka matsoho.”

⁹⁵ Empa ho itswe, “Tsatsi la Pentekosta ha le se le fihlile,” hlomamisong ya Kereke, “ha utlwahala modumo o kang wa moya o fokang ka sefelo o tswa Lehodimong, mme ntlo yohle eo ba dutseng ho yona ya tlala wona.” Ke kamoo Moya o Halalelang o tllileng kgetlo la pele. Ke kamoo O tllileng ka nako tsohle ho tloha mohlantso oo. Ke Modimo, mme ha o fetohle. Jwale, E kgopa batho.

Ho thwe, “E be e le bakeng sa tsatsi le leng.”

⁹⁶ Be, esale Yena maobane, kajeno, le ka ho sa feleng. Nako le nako, ha Kereke e ne e amohela Moya o Halalelang, kamehla O tllile jwalokaha A ile a tla kgetlo la pele, tlasa taelo yona eo ya ngaka, Diketso 2:38; ha eso fetohle, e ke ke ya fetoha.

⁹⁷ Jwaleka taelo ya ngaka bakeng sa bolwetse. O ye a ngole taelo ya sehla bakeng sa bolwetse, ngaka e etsa jwalo. Mme o e ise ho ngaka-mmotwana ya ho reng ya dihlare, mme a ntano tshela selwantsha-mahloko se se ngata ho wona, o fokola hoo o ke keng wa o thusa ka letho; ha a ka tshela tjhefu e ngata haholo ho wona, e tla o bolaya. E loketse ho ngolwa hantle feela ho ya ka ngaka.

⁹⁸ Mme taelo ya ngaka ya mokgwa wa ho amohela Moya o Halalelang e ngoletswe rona ke Ngaka Simon Petrose, ka Tsatsi la Pentekosta. “Ke tla le ngolla lengolo la taelo. Bakang, e mong le e mong wa lona, le kolobetswe ka Lebitso la Jesu Krete tshwarelong ya dibe, mme le tla amohela neo ya Moya o Halalelang. Hoba taelo ena e etseditswe ba leng hole, le bao Morena Modimo wa rona a tla ba bitsa.” Ke taelo esaFeleng!

⁹⁹ Moshe o bile le boiphihlelo bona. O ile a theohela naheng eo mme a qala a bolella batho, “Ke kopane le Topallo ya Mollo. E le ka hara sehlahla se tukang, mme O ntaetse ho le bolella. ‘KE NTSE KE LE TENG. Theoha; Ke tla ba le wena. Nka thupa e letsohong la hao mme o e phahamise hodima Egepete; seo o se kopang se tla etswa.’”

E, mohlomong moprista e mong a re, “Mepoto!”

¹⁰⁰ Empa yare hoba ba bone dintlha tse tiileng tsa taba ena, ho nka, e etsahala, keha ba sa kgone ho kgutsa. Ba tseba hore o romilwe ke Modimo.

¹⁰¹ Jwale he, haeba Moshe a re o e bone, mme a e pakela hore ke Nnete, eba Modimo o tlamehile, haeba hoo e le Nnete, ho tsebahatsa le ho netefatsa lentswe la monna eo, e le Nnete. Ho nepahetse.

¹⁰² Efela ha Jesu Krete a ne a eme mono mme a bala, tsatsing leo, “Kajeno lona Lentswe lona le etsahetse pela lona,” Modimo o tlamehile ho phethahatsa Lentswe leo.

103 Re eme mona bosiuong bona mme re bolela, ho re, “Jesu Kreste esale yena maobane, kajeno, le ka ho sa feleng.” Modimo o tlamehile ho paka hoo ho le jwalo, ka hobane Ke Lentswe la Hae. Jwale, hoo ho etsa’ng? Ho nka tumelo, ho Le dumela. Ho nka tumelo, ho dumela Lentswe la Hae, hore Ke Nnete.

104 Lemohang se hlahleng ha Moshe a ne a ntsha bana bao, le bohle ba mo latetseng. Ba sa kang ba latela ba sala Egepeta. Empa ba latetseng Moshe, yareha ba tswa Lewatleng le Lefubedu mme ba kena lefelleng, Modimo wa theohela hodima Thaba ya Sinai. Topallo ya Mollo ya hotetsa thaba yohle ya e tukisa, mme Lentswe la tswa moo la bua, homme Modimo wa fana ka melao e leshome.

105 Moshe o n’a ka tswela ka pela batho, mme o re, “Kajeno lona Lengolo leo ke le boleletseng lona, jwaloka moprofeta wa Hae, le a etsahala tsatsing leua. Ke le boleletse hore Modimo o kopane le nna, mme hodimo mane sehlahleng se tukang, ka Topallo ya Mollo, mme O boletse, sena, ‘Ke tla...Pontsho etlaba ena. O tla kgutlisetsa batho hape nqalong ena mono.’ Mme Modimo ke eo, ka Topallo yona Eo ya Mollo eo ke le boleletseng hore O ne a le ka ho yona, e lopaletse hantle mono thabeng. Kajeno lona seporofeto sena se etsahetse. Ke enwa moo A leng teng ho netefatsa hore tseo ke di boleletseng ke Nnete.”

106 Modimo re fe banna ba bang hape ba jwalo, ba tshepehang mme ba na le nnete, mme ba bolela Nnete, hore Modimo o Matlaohle o tle o netefatse hore Lentswe la Wona esale Nnete! O sa dutse e le Yena maobane, le ka mehla. Hobane’ng A ke ke a etsa hoo? O tshepisitse ho e etsa.

107 Joshua a ka be a buile sona seo, mohla a kgutlelang Kadeshe-barnea, bohole boo ba ne ba ba bo tsamaile lefelleng. Ba ne ba belaella lefatshe ho ba lefatshe la mofuta oo Modimo o ba boleletseng hore etlaba lona. Empa Modimo o na ba boleletse hore e ne e le lefatshe le letle, le neng le kolla lebese le dinotshi. Mme Joshua le Kalebe e le bona feela ba babedi ba neng ba tla dumela polelo ena, ho ba leshome ba ne ba tsamaile. Ha ba kgutla, keha ba tshwere bopaki; ba ne ba tshwere lesihla la merara le neng le ka jarwa feela ke banna ba babedi ba matla.

108 Joshua le Kalebe ba ka ema hantle mono mme ba re, “Kajeno lona Lengolo lona le etsahetse. Bopaki ba hore ke lefatshe le letle ke bona.” Ehlile. Hobaneng? “Bopaki ba hore ke lefatshe le letle ke bono. Le ne le ka di thola kae dinto tse kang tseo, Egepeta? Dibaka tse jwalo di ne di le siyo. Empa kajeno lona Lengolo lona le etsahetse.”

109 A ka bolela taba ena, ka ho tshwana, ha a ne a porofeta a re marako a Jeriko a tla helehela fatshe ka mora hoba ba a pote hasupa ba hwanta, matsatsi a supileng, hasupa ka letsatsi.

Mme yareha ba pota kgetlo leo la ho qetela, marako a heleha. Joshua o n'a ka raoha mme a re, "Kajeno lena, Molaodi wa Sehlooho wa makgotla a Morena ya mpoleletseng dibeke-beke tse fetileng hore e tla etsahala ka mokgwa wona, kajeno lena Lengolo lena le etsahetse." Mobota ke ao a robotse, a rapaletse fatshe. "A re yeng, re le nkeng. Ke la rona. Kajeno lena Lengolo lena le phethahetse."

¹¹⁰ Ho babatseha ha kakang, monna wa Modimo o ile a emela dinto tse lokileng!

¹¹¹ Iseraele, nokeng, mohla ba ruang lefatshe, ba tshela. Ba tla e etsa jwang? Ke ka kgwedi ya Mmesa. Dikgohola di a theoaha hoba lehlwa le a qhibidiha, hodimo kwana Judea. Kgele, kamoo Modimo e neng e ka mogenerale ya fokolang, ka ho ntshetsa batho ba Hae mono, ka kgwedi ya Mmesa, mohla Jordane e neng e kokomohile ho feta kamoo e kileng ya ba kateng. Ka nako tse ding. . .

¹¹² Nka nna ka emisa mona, ha ke ne ke e-na le nako, ho le fa temosonyana feela. Ka nako tse ding o ka dula mono o tshwerwe ke mofetshe, kapa e ka nna yaba o dutse ka bolwetse; o a nahana, "Hobaneng, nna, ke leng Mokreste, nka bang maemong aa? Hobaneng nka dula tjee, haeba ke le Mokreste?" Ka dinako tse ding Modimo o dumella dinto ho ntshofala hona o sa kgoneng le ho bona hodimo, ka mathoko, leha e le kae feela, mme A ntano hlahella le ho bulela tsela e parolang teng, o ile o re, "Kajeno lena Lengolo lena le etsahetse, leo A tshepisitseng ho le etsa."

¹¹³ O na tlohelle bana ba Baheberu ho kena seboping sa mollo hantle. Ba ile ba re, "Modimo wa rona a ka re namolela seboping sena sa mollo. Empa, leha ho le jwalo, re ke ke ra kgumamela setshwantsho sa hao." Eitse ha ba tswela ka ntle mono, monko wa sepobi o le hodima bona. . . ke batla ho re, ho n'o se monko wa sepobi, hodima bona; ba ne ba ka re, "Kajeno lena Lengolo lena le etsahetse."

¹¹⁴ Ha Daniele a n'a tswa lemeneng la ditau, o n'a ka bolela taba yona eo.

¹¹⁵ Johanne Mokolobetsi. Ka morao ho dilemo tse makgolo a mane tsa thuto ya kereke, ha ho makatse ha kereke eo e ne e le ditshileng lekgatheng leo! Ha a ne a hlaha lefelling, Jordane, o n'a ka ema hantle mono lebopong, jwaloka ha a entse, mme a re, "Kajeno lena Lengolo lena, Esaia 40, le etsahetse."

¹¹⁶ Kamoo nka emang mona ho le bolella seo moprista eo wa kgale a ileng a mpolella sona! Ha thwe, "Mora, ha o a qetella Molaetsa oo."

Ka re, "Thola."

A re, "O bolela hore Mapentekosta ao ha a bone hoo?"

Ka re, "Tjhe."

117 A re, “Ke a e bona.” Mme e le moprista wa Katolike, le hona! Ah-hah. A re, “Hore’ng o sa ka wa tswella?”

Ka re, “Thola.”

A re, “Ho bokwe Modimo! Ke a e bona.”

118 Mme nakong e kang eo Moya o Halalelang wa tsholohela hodima kgaitsemi ya hae, ya neng a dutse mono ka kopanong. Mme a ema, a bua ka maleme a sa tsejweng, a ba a fana ka phetolelo ya yona ntho eo nna le moprista re neng re qoqa ka yona, kalaneng. Kereke yohle, sebaka sohle sa rora. Ya tswella jwalo ho kena sebokeng sa Oral Roberts bekeng e fetileng, kapa beke pele ho e fetileng, mme e le puo ya seboka seo. Kaha kamoo moprista ya dutseng mono. . . Tlase Moya o Halalelang, wa senola teng ka mosadi, kgaitsemi ya hae kea kgolwa e ne e le yona, ka se neng se etsahala kalaneng, le ho senola yona ntho eo re neng re e patile.

119 Hora eo re phelang ho yona, kajeno lena Lengolo lena le etsahetse. Kajeno lena Masedi a mantsiboya a fihlile, mme re sitwa ho E bona. Lemohang.

120 Johanne a re, “Kajeno lena ke ‘lentswe la ya howang felleng,’ jwaloka ha moporofeta Esaia a boletse. Hlekang mmila wa Morena!”

121 Ha ba ka ba e utlwisisa. Ha thwe, “Oh, o Jesu. . . wena o—wena o Krete,” ke batla ho rialo.

122 A re, “Ha ke Krete.” A re, “Ha kea lokela le ho lokolla dieta sa Hae. Empa,” a re, “O eme hara lona, kae-kae,” hoba o ne a tiile hore O tla be a eme mono. O tla hlaha tsatsing la hae, hoba Modimo o mmoleletse hore o tla tsebahatsa Messia.

123 Ka tsatsi le leng Monna e motjha a kgaohanyatheosetsa mono, mme a bona ho kang Lesedi ka hodima Hae, pontsho. Mme a hweletsa, “Bonang Konyana ya Modimo! Kajeno lena Lengolo lena le etsahetse pela lona.” Ehlile.

124 Ka tsatsi la Pentekosta, kamoo Petrose a n’a eme le ho ba balla Lengolo la bona, la Joele 2:38; mohla bohle ba neng ba tsheha. Batho bao, ba sa kgone ho bua ka puo ya bona. Ba ne ba hwelea ntho e nngwe. Bible e itse, “Maleme a arohaneng.” *Arohaneng* ke leleme le “kgaohaneng,” ha o bue letho, ke ho holoketsa feela. Ba mathela kwana le kwana jwaloka sekgakgatha sa batho ba tahlilweng!

125 Bao bohle ba re, “Tjhe, batho bana ba tahlilwe. Ba shebang, shebang kamoo ba itshwereng kateng, kamoo basadi bao le banna. Ba tswile taolong,” ho rialo sehlopha seo se tletseng borapedi sa tsatsi leo.

126 Petrose a ema hara bona, a re, “Banna ba heso, lona ba ahileng Jerusalema, lona ba ahileng Judea, ho ke ho tsejwe ke lona hore batho bana ha ba tahwa, jwaloka le lekanya, etswe esale hora ya boraro ya letsatsi. Empa hona ke hwane ho

boletsweng ke moporofeta Joele, ‘Matsatsing a qetelo, “Ke tla tshela nama yohle ka Moya wa Ka.”’ Kajeno lena Lengolo lena le ne le etsahetse.” Ruri.

¹²⁷ Luthere o bile nakong hantle. Wesele o bile nakong hantle. Pentekosta e bile nakong hantle. Ha ho letho le tswileng taolong.

¹²⁸ Jwale ke le kopa ho hlokomela mongwaha le nako eo re phelang ho yona jwale, ka Lentswe la tshepiso bakeng sa tsatsi lena. Haeba morao kwana mengwaheng e meng, batho ba ne ba ka re, “kajeno lena Lengolo lena,” “kajeno lena Lengolo lena,” jwale he ho thweng ka Lengolo la tsatsi lee? Ho tshepisiswe’ng tsatsing lee? Re eme kae? Re phela horeng efe; haele moo tshupanako e otlala, tshupanako ya mahlale, metsotso e meraro pele ho bosiu bo boholo? Lefatshe le tshwerwe ke tshabo. Kereke e moalong wa bobodu, ho fihlela ho se motho ya tsebang moo a emeng teng. Ke nako efe ya letsatsi? Ka Lengolo la tsatsi lee teng? Maemo a kereke, kapa, maemo a kereke kajeno!

¹²⁹ Lefatsheng, dipolotiki, tsamaiso ya rona ya lefatshe, e bodile kamoo ho ka kgonehang. Ha ke radipolotiki. Ke Mokreste. Empa, ke thoko haholo le ho bua ka dipolotiki, empa ke batla ho bolela feela hore di bodile mahlakoreng bobedi.

¹³⁰ Ke voutile hang, e ne e le bakeng sa Krete; ke tlamehile ho hlola. Diabolosi o n’ a hanyetsa voutu yaka, mme Krete a nvoutela; ho tswa feela hore ke lahlela voutu yaka lehlakoreng lefe. Ke thabetse ha ke e lahletse ho Yena; a lefatshe le bue seo ba se batlang. Le jwale ke sa dumela hore esale Yena maobane, kajeno, le ka ho sa feleng. O tla e kgodisa. Ruri o tla e etsa. Ruri.

Keketseho ya bonokwane, botlokotsebe ba bana!

¹³¹ Shebang tjhaba sa rona, seo pele e neng e le palesa ya lefatshe. Puso ya rona ka setjhaba e ne boptjwe morao mono ka—ka . . . mohla phatlalatso ya boipuso. Mme phatlalatso ya boipuso ya saenwa, mme ra ba le mmuso ka setjhaba. Mme baholo-holo ba rona, le dintho tseo ba di entseng; re ba le setjhaba se sehlo.

¹³² Empa jwale sea bola, sea theleha, sea tsitsinyeha, mme sea timela. Mme se leka ho lefisa batho lekgetho, ho fumana tjelele ho e romela kwana, ho reka setswalle le sera; ba e hafela mahlong a rona hape. Ntwa e le nngwe ya lefatshe, ntwatse pedi tsa lefatshe, mme ho sa uwa ho ya boraro. Ruri. Dipotiki di bodile, di senyehile, di bodile ho fihla bohatong. Hantle feela seo Mattheu 24 e itseng se tla hlaha, “Setjhaba se tla ba kgahlano le setjhaba se seng, mmuso o be kgahlano le mmuso o mong.” Dintho tsena tsohle di tla hlaha. A re hlokomeleng sena jwale. Ke teng.

¹³³ Lemohang ntho e nngwe, keketseho tshibollong ya mahlale. Jwale, nako e nngwe, feela e . . . Ntate moholo waka o ne a etela

nkgono, ka koloi ya dipholo. Jwale ke jete, kapa esita le dihwana tse potolohang moyeng, sepakapakeng se ka ntle. Ke ntho e kgolo . . . Kamoo, ke mang ya boletseng hona? Daniele 12:4, e itse, “Tsebo e tla eketseha matsatsing a qetelo.” Re bona hora eo re phelang ho yona. Lemohang jwale e—e maemo a lefatshe, boemo ba mahlale.

¹³⁴ Mme le boele le lemohe, kajeno, tsamaisong ya rona ya thuto. Jwale le se leke ho latola taba ena. Ke tshwere dikotwana tsa masedi a ditaba, ho rutwa thobalano ka ker- . . . ka dikolong tsa rona, ya baithuti ba batjha ho ba le kamano ya thobalano mme ho shebjwe hore na ba ka kopana lefatsheng. E, monghadi.

¹³⁵ Ho ka thweng bopristeng ba rona? Bosiung bona ke tshwere karolwana e tswang leseding la ditaba. Kwana Los Angeles, California, moo sehlopha sa baruti, Baptise le Presbeteriene, bareri, ba ileng ba kenya sehlopha sa batho ba kopano-ya-bong mme ba sebetsa diketso tsa kopano-ya-bong, ba re ba leka ho ba hapela Modimo. Hodima, eo e le e nngwe ya dithohako tsa hora, Mosodoma! Mme esita le molao wa ba wa ba tshwara.

¹³⁶ Jwale he ebe re hokae? Tsamaiso yohle ya rona e bolletse tlasa rona. Ke bone hore keketseho ya diketso tsa bong ho phatlalla le Dinaha tse Kopaneng e nyolohile ka diperesente tse mashome a mabedi kapa tse mashome a mararo selemong se fetileng. E nahanisiseng, monna ya phelang le monna e mong, hantle jwaloka ha ba ne ba etsa Sodoma.

¹³⁷ Keketseho ya bonokwane, ho senyeha ha bana! Re phela horeng efe? Kajeno lena Lentswe lena la boporofeta le etsahetse.

¹³⁸ Lefatshe la borapedi, kereke ka boyona, kereke, kereke e bitsitsweng, eo re e reileng kereke e bitsitsweng, mongwaha wa phutheho ya ho qetela, mongwaha wa phutheho ya Pentekosta, o eme kae? O Laodicea, jwaloka Lengolo le boletse.

¹³⁹ Kajeno le lahetse marapo. Basadi ba bona ba apere ka ho sa tlang. Banna ba bona ba . . . Ke ntho tshabehang. Ba bang ba bona ba nyetse hane kapa hararo, ba lekgotleng la batikone, le ntho e nngwe le e nngwe esele. Ba teile kalala, mme ba kentse bobodu, hoba ba ile ba dula makgotleng mme ba ema lehlakoreng la lefatshe.

¹⁴⁰ Mme, kajeno, ba na le meaho e fetang eo ba kileng ba ba le yona. Dibakeng tse ding, e mong wa bona o haha holo ya didolara tse dimilione tse mashome a mahlano, didolara tse dimilione tse mashome a mahlano. Mapentekosta! Ba ne ba tlwaetse ho ema tlase sekgutlong, dilemong tse mashome a mabedi le metso e mehlano tse fetileng, ba tidinya moropana. Ha thwe, “Re . . .”

141 Ka hobane, Lengolo le itse, Ditshenolong 3, hore o “‘Morui,’ ho re, ‘ke morui. Ke dutse jwaloka mofumahadi. Ha ke hloke letho.’ Athe ha o tsebe hobane o madimabe, o soto, o mofutsana, o feela, o foufetse, mme ha o tsebel!”

142 Kajeno lena Lengolo lena le etsahetse mahlong le iponela. Amen! *Amen* e bolela “ha o be jwalo.” Ha ke amene ka bonna, empa ke bolela ha ke dumela hore Ke Nnete. Kajeno lena Lengolo lena le etsahetse.

143 Kereke ya Pentekosta e maamong a Laodicea. Kgele, le jwale ba sa qhoma le ho meketsa, le ho tswella ha feela mmimo o nts’o papala. Ha mmimo o kgaotsa ho papala, kapa mmimo wa morethetho o boima [‘beatnik music’—Moft.] oo bang ba bona bao papalang mme ho thwe ke Bokreste, mme hang feela ha ntho eo e kgutsa, kganya yohle e fedile. Le a bona?

144 Haeba e le thoriso ya nnete ya Modimo, ha ho diphala tse lekaneng le matla a lekaneng—a lekaneng ho e fedisa. Haeba e tswa ho Modimo ka nnete, ha e batle mmimo ho e susumetsa. Ho nka Moya wa Modimo ho theohela hodima yona. Ke yona ntho e etsang.

145 Mme kgale ba O lebetse, hoba ba hlophisitse neo ya Moya o Halalelang, “pontsho ya mantlha ke ho bua ka dipuo.” Homme ke utlwile matemona le baloi ba bua ka dipuo.

146 Moya o Halalelang ke Lentswe la Modimo ka ho wena, le Itshenolang ka ho amohela Lentswe leo. Ka ntle ho moo, e ke ke ya ba Moya o Halalelang. Haeba e re ke Moya o Halalelang, mme e latola Lentswe le le leng la Bibehe eo, e ke ke ya ba Moya o Halalelang. Ke bopaki ba hore lea dumela kapa tjhe.

147 Lemohang pontsho e nngwe hape e kgolo. Bajode ba lehaeng la bona; setjhaba ka bosona, tjehelete ya bona, setho sa Ditjhaba tse Kopaneng. Ba na le sesole sa bona. Ba na le ntho e nngwe le e nngwe. Ba lehaeng la bona; etswe, Jesu o boletse, “Ithuteng setshwantsho sa sefate sa feie.” Ke bao moo ba leng teng, ba kgutletse tjhabeng sa bona hantle. Kajeno lena Lengolo lena le etsahetse, Bajode lehaeng la bona.

148 Kajeno lena Lengolo lena le etsahetse, Mongwaha wa Phutheho ya Laodicea.

149 Kajeno lena Lengolo lena, Mattheu 24, e etsahetse. Lefatshe le bobodung, ntho yohle; ditjhaba di kgahlano le ditjhaba, thothomelo tsa lefatshe ka nqa tse ngata, ditsokotsane tse kgolo tse theohang, di sisinya ditjhaba, le jwalo, dikoduwa tse kgolo hohle. Kajeno lena Lengolo lena le etsahetse.

150 Jwale re fumane maemo a lefatshe. Re bona moo kereke ya nama, nama. . .Mokgatlo, phutheho e hlophilweng, re bona moo di leng teng. Re bona moo ditjhaba di leng teng. Mme re a bona hore kajeno lena ditshepiso tsena di etsahetse.

¹⁵¹ Jwale! Empa tsatsing lena ho loketse ho hlaha, Peo e kgolohadi ya borena ya Abrahama. Ke seo e tla be e le sona hantle feela, e tla be e le Monyaduwa wa borena, ho Mora wa borena ya tshepitsweng. Jwaloka ha ke boletse bosiuung bo fetileng, e ke ke ya ba peo ya nama, e tla ba Peo ya moya. Ho loketse ho hlaha Monyaduwa wa moya, eo e tla ba Peo ya borena ya Tumelo ya borena ya Peo ya Mora wa Abrahama wa Borena. O loketse ho hlahella temeng matsatsing a qetelo, mme nako le sebaka ke tshepiso e neilweng Yena.

¹⁵² Ho latela Malakia 4, Lengolo, ho loketse ho hlaha Molaetsa o tla sisinya dipelo tsa batho o di busetse tumelong ya bontate ba baapostola hape. E mong o loketse ho hlaha temeng, ka matla a Elia, ya tla hlaha temeng; monna ya tla tswa wa lehwatata, mme o tla ba le Molaetsa o tla matha hantle o kgutlela Lentsweng hape. Ke hora eo re phelang ho yona.

¹⁵³ Hape, hlokomelang jwale, ke a le botsa horeng ena, lona batho ba mona Jeffersonville. Ka 1933, Lesedi le ka hodima tlholeho le ileng la theohela nokeng kwana, mohla ke neng ke kolobetsa makgolo a mahlano ka Lebitso la Morena Jesu Krete, moshanyana wa dilemo tse ka bang mashome a mabedi. Le ile La reng, Jeffersonville? E ne e le Eng maotong a Seterata sa Spring mono, mohla *Courier Journal*, kea kgolwa e ne e le yona, *Louisville Herald*, e hlhisang taba tsa Lona? Ya ya kena le kwana Associated Press, ho ya fihla Canada. Ngaka Lee Vaile a e seha pampiring, hodimo kwana Canada, ka 1933.

¹⁵⁴ Yareha ke sa kolobetsa motho wa ka wa leshome le metso e supileng, tlasa Bopaki bona; mme le tseba pale eo kaofela. Mme yare ke sa eme mono, ke kolobetsa motho wa leshome le metso e supileng, Lesedi la tswa Lehodimong, le tjhabetse fatshe hodimo mono, jwaloka Naledi e wang Lehodimong. Lentswe la re, “Jwaloka ha Johanne Mokolobetsi a rometswe ho etella ho tla ha Krete la ho qala, Molaetsa wa hao o tla etella ho Tla ha Hae la bobedi, lefatsheng lohle.” Kajeno lena Lengolo lena le etsahetse.

¹⁵⁵ [Phutheho e a nyakalla—Mongodi.] Kajeno lena! [Phutheho e nyakalla ruri mme e rorisa Modimo.] Modimo o e tshepitswe. Ho ile ha etsahala’ng? Kajeno lena O haotse lefatshe ka bophara.

¹⁵⁶ Mme yareha Modimo a theohela tlase mono le ho bua taba eo, ke sa le moshanyana, sehlahleng se tukang, kapa sehlahleng hodimo mono, se tukiswa ke Topallo ya Mollo, hodimo mona sebakeng sa Wathen mane Utika Pike; ke kga metsi tlase mono, ho tswa modikong ho ya tlung thitelo e sa dumellwang, le tseba nnete ya yona. O ile a re, “O se ke wa tsuba, kapa wa nwa, kapa wa silafatsa mmele wa hao, hoba ho na le mosebetsi oo o tlang ho o etsa mohla o holang.” Ke paka hore hoo ke Nnete,

hore ke E bone. Mme Modimo, jwaloka ha A entse ho Moshe, a bua ka pela phutheho tlase mono, le ho re, “Taba ena ke Nnete.” Kajeno lena Lengolo lena le etsahetse hara rona.

¹⁵⁷ Elang hloko seo A se boletseng ka temoho ya meya, le kamoo e neng e tla ba kateng; ho tswa ho beeng matsoho hodima bona, ho ya fihla ho tsebeng merero ya pelo. Kajeno lena Lengolo lena le etsahetse pela mahlo ona a rona.

¹⁵⁸ Ditshepiso tsena di entswe, lemohang, ditshepiso tsena tsohle di netefaditswe le ho phethahatswa ke Modimo ya entseng tshepiso. Bonang, ho leketlileng kwana Washington, D.C., bosiueng bona, ke foto ya Lengeloi la Morena!

¹⁵⁹ Jwaloka George J. Lacy, hlooho ya Biro ya menwana le ditokomane [F.B.I.—Moft.] ya mmuso wa Dinaha tse Kopaneng, a Le hlahloba ho tswa Houston, Texas, mme a re, “Ke yona feela Hloleho e ka hodima hlaho e kileng ya fotwa lefatsheng lohle.” O loketse ho tseba; ke ya hlwahlwa ka ho fetisisa lefatsheng, tabeng tseo.

¹⁶⁰ Lemohang, ke Eo moo e leketlileng, jwaloka Nnete, yona Topallo ya Mollo e eteletseng Iseraele pele morao kwana lefelleng. E etella pele kajeno, Molaetsa wa mofuta o le mong, wa, “Tswang Egepeta!”...?...Kajeno lena Lengolo lena le etsahetse. Le tseba Molaetsa A o boletseng.

¹⁶¹ Tadimang pono ya Tucson, dilemo tse tharo tse fetileng, ha ke ne ke eme mono tselaneng. Moo, dilemo tse hlano pele ho moo, A itseng, “Mohla motse o kgokgothelang thupa ka pela heke eo, o lebe nqa Bophirimela.” Bomphato ba Tabernakele yaka ba leng teng mona, ba tseba taba eo, ho tloha mohlang oo—oo. Ke nnete.

¹⁶² Mme mohla Mong. Goynes le bao ba neng ba le hodimo mono, mme ba kgokgothella thupa eo, ka re ho mosadi, “Hona le ho hong ka taba ena.”

A re, “Ke eng?”

Mme yaba ke a kena mme ka sheba bukaneng ya ka. Ke eo moo e ne le teng.

¹⁶³ Mme hoseng ho latelang, ka hora ya leshome, ke dutse mono, phaposing yaka mono, hora e batlile ho ba ya leshome, Lengeloi la Morena la theoha. La re, “Eya Tucson. O tla dula leboya-botjhabela ho Tucson, mme ho tla tla Mangeloi a supileng ka senkgome se tla sisinya lefatshe ka nqa tsohle ho wena.” Mme ha thwe, “O tla bolellwa teng ho tloha moo.”

¹⁶⁴ Ke ba bakae ba hopolang hono, mona, kgale kwana pele e etsahala? [Phutheho e re, “Amen.”—Mong.] Ho na le banna ba dutseng hantle ka mohahong wona bosiueng bona, ba neng ba eme hantle mono mohla e ne e etsahala.

¹⁶⁵ Mme ha thwe, “Ditiiso tse Supileng tsa diphiri tsohle tsa Bible tse patilweng di tla manollwa, le ho phethahatsa

Tshenolo 10, hore Molaetseng wa Lengeloi la bosupa dintho tsena di tla phethahala.” Kajeno lena Lengolo lena le etsahetse mahlong a rona. Kajeno lena Lengolo lena le etsahetse.

¹⁶⁶ Ngwahola, ke ne ke eme hona sebakeng seo, Mong. Woods mona le nna, re ne re nyoloha leralla, re batla re le bofifing, ka baka la mosadi wa hae ya kulang. Moya o Halalelang wa re, “Thonaka lejwe le robetseng mono. Le lahlele hodimo moyeng. Ha le fihla fatshe, o re, ‘HO RIALO MORENA, ho tla ba le kahlolo e tla otlala lefatshe.’ Mmolelle hore o tla bona letsoho la Modimo, dihoreng tse mmalwa tse latelang.”

¹⁶⁷ Ka bolella Mong. Woods; o teng bosiueng bona. Mme, kea kgolwa, banna ba robedi kapa ba leshome, kapa leshome le metso e mehlano, ba neng ba le teng mohlang oo ha e ne e etsahala; hoseng ho latelang, moo Morena a ileng a theoha ka setsokotsane mme a petsola thaba ka mathoko ho rona, le ho kgaola dihloro tsa difate, mme ha hlaha diphatloho tse tharo, mme ha thwe, “Kahlolo e lebile nna Lebopo la Bophirima.”

¹⁶⁸ Matsatsi a mabedi ka mora moo, Alaska ya batla e teba tlasa lefatshe. Mme ho tloha mohlang oo, hodimo-le-tlase Lebopong, ho befa ha kahlolo ya Modimo kgahlano le lesira leo la moya. Ho na le lesira la tshepe, ho na le lesira la bamboo [lethobane—Moft.], mme ho na le lesira la sebe.

¹⁶⁹ Tswelopele e tsamaile le letsatsi; ho jwalo le ka Evangedi. Ba tlohile Botjhabela mme ba ya Bophirimela, jwaloka ha letsatsi le tsamaya. Mme jwale E Lebopong la Bophirima. E ke ke ya ya pejana; ha E tswela pele, E tla be e kgutletse botjhabela hape.

¹⁷⁰ Moporofeta o boletse, “E tla ba letsatsi le ke ke la e-ba le bosiu leha e le nyene,” tsatsi le hlokang matshediso, pula e ngata le mohudi, ho lekaneng feela ho tseba kamoo ho ineelwang kerekeng kapa ho ngodisa lebitso la hao bukeng. “Empa nakong ya mantsiboya Lesedi le tla ba teng.” Kajeno lena Lengolo lena le etsahetse.

¹⁷¹ Lona—lona s-u-n [letsatsi—Moft.] le tjabang botjhabela ke lona s-u-n le dikelang bophirimela. Mme yena S-o-n [Mora—Moft.] wa Modimo ya hlahleng botjhabela le ho Inetefatsa jwaloka Modimo o bonahaditsweng nameng, ke yena S-o-n wa Modimo ya leng hemisfereng e ka bophirimela mona, ya Itsebahatsang pakeng tsa kereke bosiueng bona, esale yena maobane, kajeno, le ka ho sa feleng. Lesedi la mantsiboya la Mora le tlile. Kajeno lena Lengolo lena le etsahetse ka pela rona.

¹⁷² Re hokae mongwaheng wona wa Abrahamama? Re hokae nakong e kgolo ena eo re emeng ho yona, hora e kgolo eo re phelang ho yona? Dipono tsohle di phethilwe.

¹⁷³ Ho ka thweng mohlala motswallenyanana wa rona wa moreri mona, kgaitse di ya rona ya kereke e tswalwang mona ho ya rona, Junior Jackson, a ne a re mathela bosiu bo bong, ke le

tlase mono. Ho re, “Ke lorile e—e toro, Moena Branham, e nkgathatsang. Ke bone baena bohle ba bokane hodima leralla.” Le ho re, “Hodima leralla lena, o nts’o re ruta diletere tse neng di ngotswa, eka, diletere tseo thloleho e di betlileng lefikeng. Hoba o qete hoo, hoba hoo ho fete, wa re laela, ho re, ‘Atamelang,’ mme rona bohle ra phutheha.”

174 Ho re, “O ile wa nanabela kae-kae mme, yaka, o nka kepa mme wa hlatha hloro ya piramite ena wa e phetla. Mme, hoba ho etswe,” a re, “moralla o mosweu o se nang mongolo hodima wona. Mme wa re laela ho ‘sheba ntho ena.’ Mme lona bohle. . . Rona bohle ra qala ra sheba.” Ho re, “Ka thintsha hlooho ya ka, mme ka o lemoha o ya nqa bophirimela, ka matla kamoo o neng o ka kgona, nqa bodikela letsatsi.” Ke ba bakae ba e hopolang? [Phutheho e re, “Amen.”—Mongodi.]

175 Mme ka ema mono ho se hokae ho fihlela Moya o Halalelang o e senola. Ka re, “Bibele yohle, kamoo ho senolwetsweng motho, ka tokafatso, kgalaletso, kolobetso ya Moya o Halalelang, kolobetso ya Lebitso la Jesu, le dintho tsena tsohle, di senotswa; empa ho na le diphiri tse patilweng ka hare, ka hoba Bibele e tiisitswe ka Ditiiso tse Supileng. Ke tshwanetse ho ya mono ho e fumana.”

176 Hoseng hoo Mangeloi ao a supileng a neng a theoha mme a qhomisa lefatshe, le majwe a fofela ka nqa tsohle, Mangeloi a supileng a ema mono mme a re, “Kgutlela Jeffersonville, moo o tswang teng, hoba Ditiiso tse Supileng tsa diphiri tse supileng di tla manollwa.”

177 Ke rona bana, kajeno, re utlwisisa *Peo ya Noha*. Matsatsing a mmalwa, ha Modimo o rata, re tla utlwisisa nepahalo ya *Lenyalo Le Hlalano*. Le dintho tsena tsohle tseo Modimo a di manolotseng, Tiiso e nngwe le e nngwe, diphiri esale ho thewa lefatshe. Mme re bile monyakeng, Boteng ba mahlohonolo a Hae! Ke nnete. Kajeno lena, Lengolo lena!

178 Makasine wa *Life* o ne o hlahisitse sekotwana sa yona, “Sedikadikwe sa Lesedi le mohlolo se phahamela moyeng hodima Tucson le Phoenix,” ka moo ke le boleletseng ntho e ka etsang selemo pele e hlaha, kamoo ho neng ho tla ba kateng, le jwaloka kgutlo-tharo. Setshwantsho seo se leketlile ka kerekeng tlase mono. Lona le nkileng makasine oo le a le fumana. Ke leo moo le neng le le teng, hantle feela. Ba ile ba re, “Le bophahamong ba dimaele tse mashome a mabedi le metso e supileng le boahlamo ba dimaele tse mashome a mararo.” Le jwale ha ba tsebe se etsahetseng. La hlaha ka moksowa o mohlolo mme la tsamaya ka moksowa o mohlolo.

179 Moena Fred Sothmann, Moena Gene Norman le nna, re eme mono. Boraro ke paki. Jwaloka ha A isitse hlorong ya thaba; Petrose, Jemese, le Johanne, ho paka. Ba ema mono mme ba e shebella ha e ne e etsahala, ba e bona e etswa.

¹⁸⁰ Ke Leo moo le le teng, le lopaletse sebakeng; hole ha kana, ho seng phofudi, ho seng mongobo ho seng letho ho e—etsa phofudi. Di ne di ka fihla jwang moo? E ne e le Mangeloi a Modimo a kgutlang, ka mora Molaetsa wa wona. Kajeno lena boporofeta boo bo etsahetse hara rona. Kajeno lena Lengolo lena le etsahetse.

¹⁸¹ Tadimang, Ditiiso tse Supileng di manolotswe. Ditsokotsane di lebile lebobong la Bophirima. Jwale, le se ke la e fosa, jwaloka ha ba entse morao mane.

¹⁸² Jwale, maikutlo a rona, a atamele tsatsi la rona ho se hokae. Lengolo le reng ka tsatsi lena, le kaha nako eo re phelang ho yona? Ke Jesu ya buang. . . Nke ke ka ba le nako ya ho a qotsa kaofela, empa ke batla ho qotsa lena pele re kwala.

¹⁸³ Jesu o itse, ho Mohalaledi Luke kgaolo ya 17, temana ya 30. Jesu Kreste, Lentswe ka BoLona! Na le a e dumela? [Phutheho e re, “Amen.”—Mong.] Jesu Kreste, Lentswe ka BoLona, le entsweng nama, a bua mme a bolela seo Lentswe le tla ba sona nakong ya qetelo, hore pontsho ya bofelo ba lefatsho e tla ba efe. O ba boletse hore setjhaba se tla tsohela setjhaba se seng matla, empa A re, “Le hona ho tla ba jwaleka ha ho kile ha etsahala matsatsing a Sodoma, ho tla ba jwalo ka letsatsi leo Mora motho a senolwang ka lona.”

¹⁸⁴ Jwale, ha Jesu a ne a fihla lefatsheng, O tlile ka lebitso la Bara ba bararo. Mora motho, e leng moporofeta; Mora Modimo; le Mora Davida.

¹⁸⁵ Jwale, O ile a phela lefatsheng mona. Ha A re E ne e le Mora Modimo. O itse, “Ke Mora motho.” Jehova ka BoYena o bitsitse Ezekiele le baporofeta, “Mora motho.” Ka hobane, O ne a loketse ho tlatsa Lengolo jwaloka moporofeta. Moshe o n’a re, “Morena Modimo wa lona o tla le hlahisetsa Moporofeta ya jwalo ka nna.” Ke ka hona E ne ke ke ya ba Mora Modimo mono, hoba E ne e le Mora motho. Yena. . . “Lentswe le tlile ho baporofeta.” Mme E ne e le Lentswe botlalong ba Lona. Mora motho, yena—yena moporofeta a moholo. . . E seng moporofeta e moholo, Modimo-Moporofeta, “Botlalo bohle ba BoModimo bo ne bo ahile ho Yena ka mmele.” Ha ho le jwalo, E ne e le Mora motho.

¹⁸⁶ Jwale, dilemong tse dikete tse pedi, O tsebahetse ho rona jwaloka Mora Modimo, Moya.

¹⁸⁷ Mme dilemong tse Sekete, E tla be e le Mora Davida, Teroneng. Re tseba hoo bohle, ba dumelang Mangolo.

¹⁸⁸ Jwale, Jesu o boletse, hore pheletsong ya mongwaha wa phutheho ena eo re phelang ho yona, ho re, “Mora motho o tla senolwa hape ka moo ho bileng kateng, jwaleka ho etsahetse Sodoma.”

¹⁸⁹ Tadimang kamoo, ho latela nalana, A e beileng. O ile a re, “Jwaleka ha ho ne ho etsahale mehleng,” pele, “ya Noe, kamoo

ho ne ho jewa, ho nowa, ho nyalwa, ho nyadiswa.” A ntano hlahisa, ntho e latelang, ya ho qetela, ho Mora motho, Sodoma. Hoba, moo O ne a sebetsana le Bajode; mona, Sodoma, O sebetsana le Baditjhaba. Mono, O ba kgamisitse metsi bohle, kahlolong; mona, ho Baditjhaba, A ba tjhesa bohle tsatsing la Sodoma. Ke hantle. Lefatshe la Baditjhaba la tukiswa mono, “le hona ho tla ba jwalo ha Mora motho a senola.” Ha e sa le metsi hape, empa e tla ba mollo kgetlong lena. Jesu o badile yona Genese 23 eo re balang ho yona, ha A ne a bala ka Sodoma.

¹⁹⁰ Jwale, re dumela maemo ao ho buuwang ka wona, e leng maemo a lefatshe a Sodoma, Basodoma, maemo a Sodoma. Rona, e mong le e mong, re ka re “amen” tabeng eo. Re a e dumela. Ho lokile.

¹⁹¹ Le maemo a moya a Laodicea, kereke ya nama, re tla re “amen” tabeng eo, le ho amohela matshwao a tsona. Re tseba hore pontsho ka nngwe e teng mono. Kereke e Laodicea. Re tseba taba eo. [Phutheho e re, “Amen.”—Mong.]

¹⁹² Re a tseba lefatshe le maemong a Sodoma. Na ho jwalo? [Phutheho e re, “Amen.”—Mong.] Re tla amohela taba eo.

¹⁹³ Empa ka pontsho ya Abrahamama teng, yena ya emetseng mora wa tshepiso? Eo e ne e le e mong.

¹⁹⁴ Hopolang, ba ne ba e-na le Sodoma morao mono; ba ne ba e-na le moromuwa wa bona. Mme Abrahamama a ba le Moromuwa ya tlang ho yena.

¹⁹⁵ Abrahamama o ne a lebeletse, letsatsi ka letsatsi, bakeng sa ntho e ke keng ya etswa ho hang. “Sarah, a le mashome a robong, mme yena lekgolo.” Ho latela tshepiso ya Modimo, a nna a lebella. Hara dinyefolo tsohle, o ne a emetse mora eo.

¹⁹⁶ Ho jwalo le modumedi wa sebele o lebeletse Mora eo wa tshepiso ho kgutla! Lemohang, pejana feela mora a fihla, ha ba le pontsho eo a e fuwang. Na pontsho ya Mora ya tlang ha e a tlameha ho senolelwa Peo ya Borena ya Abrahamama e leletseng Mora wa Borena, jwaleka ha ho etsahetse ho ntate Abrahamama ka mora wa nama? [Phutheho e re, “Amen.”—Mong.] E nepahetse? [“Amen.”] Jesu o boletse jwalo, mona ho Mohalaledi Luka 17:30, “Pele nako ena e fihla, hore, Mora motho o tla senolwa jwaloka ha A entse matsatsing a Sodoma, pele ho tshenyeho ya Sodoma.” Jwale re shebeletse pontsho.

¹⁹⁷ Jwale a re nkeng maemo a nako jwaloka ha ho etsahetse Sodoma. Lemohang, bohle ba ile ba kena Bosodomeng, lefatshe.

¹⁹⁸ Ke kgolwa hore e mong wa batsamaisi ba ditshwantsho o hlahisitse setshwantsho, nakong e seng kaalo ya ho feta, mme ka se bona, e ne e le sa, *Sodoma*. Haeba le ka e bona ha ho letho ho sona haese hono, se shebeng. Ruri ke setshwantsho se

setle sa Dinaha tse Kopaneng kajeno, Hollywood, hantle feela; mokgwa wa moaparo le ntho e nngwe le e nngwe eo ba e entseng jwaloka mono; mekete ya botahwa ya ditletle le ntho e nngwe le e nngwe, seng sa batho ba tletseng borapedi, bao ho thweng ke barapedi.

¹⁹⁹ Lemohang, mme Sodoma e ile ya fumana paki, mme e le thaka le bitswang Lota, eo e neng e le motswala ho—ho Abrahama feela.

²⁰⁰ Jwale, Abrahama ha a ka a theohela Sodoma, yena le sehlopha sa hae. O ne a e-na le sehlophahadi ho yena, se ka ka se ka lwantshang marena a ka bang leshome le metso e mmedi le mabotho a wona. Ka hona, a e-na le sehlophahadi ho yena. Mme o n'a dutse ka ntle mono tlasa sefate sa eike, ka tsatsi le leng, mohla ntho e nngwe le e nngwe e neng e mo tsamaela hampe; ho se motho ya kena-kenanang le yena ka letho, empa le jwale a nts'a itshwareletse tshepising eo.

Tadimang jwale, ka kelo hloko, pele re kwala.

²⁰¹ Yare a sa dutse mono, ha theosa monna ba le bararo, ho tla ho yena. Ba babedi ba bona ba theoaha ba kena Sodoma, mme ba ba bolella Evangedi, ho tswa, ho Lota. Na ho nepahetse? [Phutheho e re, "Amen."—Mong.] Empa EMong a sala le Abrahama. Lemohang, Ya neng a setse le Abrahama e ne e le Modimo ka BoYena. Ba bang ba babedi e le barongwa Lengoloi.

²⁰² Jwale, tlase Sodoma, ha ba ka ba etsa mehlolo ya letho, haese ho ba otlala ka bofoku. Mme kamehla polelo ya Evangedi e a ba fufatsa.

²⁰³ Jwale tadimang madulo a tsatsi leo. Ho na le kereke ya nama. Kamehla ka bo-tharo, jwaleka ha ke boletse maobane bosiu, Modimo o a hlalisoa. Ho ne ho e-na le Basodoma; ma-Lota; le ma-Abrahama. Ke madulo a tshwanang bosiu bona, lefatshe le dutse ka mokgwa oo.

²⁰⁴ A nke ke le botse taba. Tadimang madulo ana jwale. Abrahama o bitsitse Monna enwa ya buileng le yena, "Elohim." Lentswe la Seheberu *Elohim* le bolela "Ya ruileng bokgoni-bohle, Eo e leng Mohlolehi," Elohim, Modimo ka Sebele!

²⁰⁵ Tshimolohong, Genese 1, e boletse, "Tshimolohong Modimo. . ." Nkang lentswe la Seheberu mono, e leng hore ke, kapa lentswe la Segerike, ke rialo, "Tshimolohong *Elohim* o ne a hlale mahodimo le lefatshe."

²⁰⁶ Mona, O, ho Genese, nkare 22 mona, O bua hape, kapa—kapa nka re 20, O ile a bua, yaba o bitsa lebitso la Monna enwa "Elohim." Hobane'ng a entse hono? Modimo, a bonahetse nameng ya motho, a ba a dula le Abrahama le ho ja sementjhise ya kgomo, a nwa lebesenyana, le ho ja bohojana. Modimo ka Sebele, mme a nyamela hantle ka pela Abrahama.

207 Empa O ile a mo fa pontsho. Lemohang. Mme pontsho eo e le ya hore O ne a file tente mokokotlo wa Hae.

208 Mme hopolang, Abrahama, lebitso la hae e ne e le *Abram* matsatsing a mmalwa pele ho moo, mme Sarah e le *Sarra* pele ho moo; S-a-r-r-a e ntano ba S-a-r-a-h, le A-b-r-a-m ho A-b-r-a-h-a-m. *Abraham* e bolela “ntata ditjhaba.”

209 Jwale hlokomedisang mona, mme re tla bona madulo a hora eo re phelang ho yona jwale, jwaloka Jesu a re laetse ho hlahloba madulo ana. Re bone hore tse ding tsohle di hantle; jwale a re boneng ho Peo ya borena, hore ke madulo a jwang ao ba loketseng ho a bona.

210 Jwale Monna enwa a re, “Abraham, mosadi wa hao o kae, Sarah?”

Mme Abrahama a re, “O ka tenteng, ka mora Hao.”

211 Jwale, O ne a e-so bone mosadi eo. A tseba jwang hore lebitso la hae e ne e le *Abraham*? A tseba jwang hore lebitso la hae e ne e le *S-a-r-a-h*? “Abraham, o kae mosadi wa hao, Sarah?”

Ho re, “O tenteng, ka mora Hao.”

212 A re, “Ke . . .” “Ke,” leemedi la motho. “Ke tla o etela ho latela tshepiso. Mosadi wa hao o tla fumana lesea leo. O ile wa ntshepa, jwale Ke tla e phethahatsa.”

213 Mme Sarah, ka tenteng, ka morao, a utlwella, kapa a utlwa ka tsebe, e leng hore le e bitsang, a mametse le tenteng, a re, a tsheha ruri, mme a re, “Jwale, nna, mosadimoholo ya kang nna, nka thaba le morena wa ka; mme o tsofetse, le yena, ka ntle ka mono dilemong tse lekgolo? Kgele, taba ena ha e-so etsahale dilemong tse ngata, ngata.”

214 Mme Monna, M-o-n-n-a, ya dutseng mono a e ja, nameng ya motho, ho nwa le ho ja jwaloka ka motho ya tlwaelehleng; ka lerole diaparong tsa Hae, mme a e-na le lerole maotong a Hae, mme Abrahama o bile a le hlatswa. Modimo, ka Sebele, a qamaka, mme A re, “Sarah o tshetsetse’ng, morao ka tenteng, a bolela taba *ena*?” O tsebile, a ka senola mehopolo ya Sarah ka tenteng, ka mora Hae. Na ho lokile? [Phutheho e re, “Amen.”—Mong.]

215 Jwale, mohla Peo ya Borena ya Abrahama e neng e fihla lefatsheng, E ile ya bontsha pontsho efe, Mora motho. Simone o n’a tle ho Yena ka tsatsi le leng; Andrease a mo tlisitse. A re, “Lebitso la hao o Simone. O mora wa Jonase,” A rialo. Le a bona, polelo eo ya mo etsa modumedi.

216 Filippi a tlolela kwana mme a fumana Nathanaele; a kgutla, ho re, “Tloo, o bone Monna Eo rona re—rona re mo fumaneng; Jesu wa Nazaretha, mora Josefa.”

217 A re, “Be butle. Na ho na le ntho e molemo e ka tswang bohlangeng boo?”

A re, "Tloo, o bone."

218 Ka baka leo yare ha Filippi a fihla pela Sefahleho sa Jesu, le Nathanaele, Jesu a mo tadima le ho re, "Bonang Moiseralele eo ho seng mano ho yena."

A re, "Rabbi, O ntsebella kae?"

219 Ho re, "Le pele Filippi a o bitsa, o sa le tlasa sefate, Ke o bone."

220 A re, "Rabbi, O Mora Modimo. O Morena wa Iseraele!"

221 Mohla mosadi e monyenyanane sedibeng, maamong a hae a boitshwaro bo hlephileng, a tla, sebakeng se totobetseng tjena, ho kga metsana. Jesu o ne a kgutlisitse barutuwa ba Hae, ho fumana dijo. Yare ha a fihla ho kga metsi, A re, "Mosadi, Ntlisetse metsi."

222 A re, "Ha se molao hore O rialo. Athe ha re na kopano mona. Jwale, Bajode ha ba kopane le rona Basamaria; ha ho moo re amanang teng le lona."

223 A re, "Empa, mosadi, hoja o ne o tsebile Ya buang le wena, ke wena o ka beng o qetse metsi ho Yena. Ke ne ke tla o fa metsi ao o sa tlang ho a kga mona."

224 A fumana moo maemo a hae a neng a le teng, seo e neng e le sona. A re, "Ya bitsa monna wa hao, mme le tle kwano."

A re, "Ha ke na monna."

225 A re, "O boletse hantle. Hobo o kile wa ba le ba bahlano, mme eo o nang le yena jwale ha se wa hao."

226 A re, "Monghadi, kea bona hobane O moporofeta. Re tseba hobona Messia mohla A tlang o tla re bontsha dintho tsena." [Moena Branham o kokota sefaleng hane—Mong.]

Jesu a re, "Ke Yena."

227 Ka polelo eo, a matha a kena motseng mme a re, "Tlong, le bone Monna Ya mpoleletseng tseo ke di entseng. Na e ke se be yena Messia?"

228 Tadimang, seo O se entse pela Bajode, le Basamaria, empa e seng Baditjhaba le ka mohla. Baditjhaba, rona batho, re ne re le bahetene mehleng eo, ditjhaba tse ding, re jere melamu mokokotlong wa rona, re kgumamela diseto. Re ne re sa lebella Messia wa letho.

229 O hlahela ba Mo lebeletseng, mme re loketse re be re Mo lebeletse.

230 Empa bao ba ipoletseng hore ba Mo lebeletse, kereke ka boyona, yare ha ba bona hoo ho etswa, ba re, "Ke diabolosi. Ke senohe-ramahlohonolo, Belsebule!"

231 Mme Jesu o ile a re, "Sebe seo ba tla se tshwarelwa," hoba A ne a eso shwe. "Empa," ho re, "tsatsi le leng Moya o Halalelang o tla tla mme o sebetse yona ntho eo, mme ho bua lentswe le le leng kgahlano le Wona ho ke ke ha tshwarelwa." Ke tsatsing lena,

moo Lentswe le leng le le leng le loketseng ho leketla mmoho. “Wa bua lentswe kgahlano le Wona; ho ke ha tshwarelwa hona lefatsheng lena kapa lefatsheng le tlang ho tla.”

²³² Eo e ne e le Peo ya Borena ya Abrahama. Mme ke mona Peo eo ya Borena ya Abrahama, e tlileng ka baka la boitsebiso boo ba Monna ya dutseng mono le Abrahama, e tlike ho paka hore E ne e le Modimo o le mong, ka ho tshepisa tsatsing lena, “Jwaleka ha ho no ho etsahale matsatsing a Sodoma, ho tla ba jwalo ka letsatsi leo Mora motho a tla hlaha ka lona, mohla A Itshenolang jwaleka Mora motho.” Amen. Lena ke tsatsi leo Lengolo lena le loketseng ho phethahatswa ka lona.

²³³ Shebang madulo ao re leng ho wona kajeno. Shebang kereke eo moo Mora Modimo. . . Sheba letsatsi le hlokgang matshediso. Shebang diporofeto tsohle. Jwale, ntho e hlolang, kete- . . . tsa rona di tseleng he, haeba madulo a tlamehile ho tshwana le kwana Sodoma.

²³⁴ Ho bile le ba bararo ba bona ba tlileng, monna ba bararo ba ikgethileng ba rometsweng ho tswa Lehodimong. Re tla dumellana le hono. Ba bararo ba bona; EMong a sala le Abrahama. Bohle ba qadile moo, empa EMong a sala le Abrahama Ba bang ba bona ba theohela Sodoma. Na ho nepahetse? [Phutheho e re, “Amen.”—Mong.] Mme Abrahama a fetotswe lebitso, ho tswa ho Abram ho ya ho Abraham. Ke nnete? [“Amen.”]

²³⁵ Le ka mohla o le mong historing, kereke ya lefatshe, ha eso ka e ba le moevangedi ya e etelang, ka lebitso le qetellang ka h-a-m, ho fihlela tsatsing lena, Billy G-r-a-h-a-m. Na ho nepahetse? [Phutheho e re, “Amen.”—Mong.] G-r-a-h-a-m, ditlhaku tse tsheletseng. A-b-r-a-h-a-m ke ditlhaku tse supileng. Empa G-r-a-h-a-m ke ditlhaku tse tsheletseng, e leng lefatshe, motho. Le a bona?

²³⁶ Shebang ho tswetsweng ntle mono, kajeno, ke barongwa bao ba rometsweng ba tswa Lehodimong.

²³⁷ Na ho na le monna lefatsheng ya kgonang ho rera pako ka ho hlaka jwaloka Billy Graham? Na ho kile ha ba le monna ya bileng le tshusumetso hodima batho, jwaloka Billy Graham? Ha eso ho be teng, lefatsheng ka bophara, monna. Oh, Billy Sunday, le ba jwalo, ba ne ba le mona Dinaheng tse Kopaneng, empa Billy Graham o tsebahala lefatsheng ka bophara. Le bona moo a hlabang mokgosi teng? Ho tswa Sodoma.

²³⁸ Mme o na le moifo o mo tlatsang mono o sebetse le kereke ya Pentekosta, Oral Roberts.

²³⁹ Empa ho ka thweng ka sehlopha sa Bakgethwa? Ke pontsho ya mofuta ofe eo ba loketseng ho e bona? Ba tlamehile ho ba le eng? Hallelua! “Lesedi le tla ba teng nakong ya mantsiboya.” Kajeno lena Lengolo lena le etsahetse. [Phutheho

e a nyakalla—Mong.] Kajeno lena tshepiso ya Modimo e phethilwe. Re a tseba hore hoo ke Nnete. O teng mona bosiuung bona jwaloka ha A ne a le teng mohlang oo.

²⁴⁰ Jwale, ho rera taba, e leng taba eo ke sa tswa e bolela, efela ha o rera taba efe feela mme e le Nnete ya Evangedi, eba Modimo o tlamehile ho netefatsa taba eo. Na ho nepahetse? [Phutheho e re, “Amen.”—Mong.] Jwale, ha ho le jwalo, a Modimo o ngotseng Lentswe, a Modimo o entseng tshepiso, a Modimo eo e leng Modimo wa Lentswe, a ke a tle mme a kgodise hore E sa le Modimo.

²⁴¹ Jwaloka ha Elia a ile a nyolohela thabeng; a shebile, Elisha a tloha a shebile Elia, o ile a re, “Ke batla karolo tse pedi.” Mme kobo eo e neng e le hodima Elia ya wela hodima Elisha. Yaba o a theoha, mme a mena kobo eo a phutla noka, mme a re, “O kae Modimo wa Elia?” Mme yona ntho e entsweng ho Elia, ya etswa ho Elisha.

²⁴² Mme yona Evangedi, ona Matla ao, yena Mora eo wa motho ya neng a le teng maobane, o teng kajeno, mme o tla ba teng ka mehla. Baheberu 13:8. Na le a e dumela? [Phutheho e re, “Amen.”—Mong.] Ha ho le jwalo, kea le botsa. Nke ke ka ba Yena, empa O teng mona. [“Amen.”] Re mpa re le bajari feela.

²⁴³ Ho ba bang ba lona batho ka ntle mono, ba kulang mme ba hlokoletse, ba tsebang hore ha ke le tsebe, a Modimo jwale. . . ha nka ikokobetsa ka ho lekana. Le rapele mme le kope Modimo.

²⁴⁴ Ha ke kgolwe. . . Ha ho setlankana sa ho rapellwa ka mohahong, na se teng? Tjhe, ha ke. . . Ha rea ntsha ditlankana tsa ho rapellwa. Re tla tshwara tshebeletso ya thapelo kwana. . . kapa phodiso ya bakudi, kerekeng. Empa, le rapele.

²⁴⁵ Mme lea tseba hore ke o sele ho lona ka botlalo. Lea bona, lona lea ntseba, Jeffersonville! Ha ke batle ha batho ba tswang Jeffersonville ba etsa hono. Ke batla batho ba tswang hole le mona sebakeng se seng. Ho bona hore na Modimo o sa ntse a senola! Ho bona na E sa le yena maobane, kajeno, le ka ho sa feleng!

²⁴⁶ Etsang jwaloka ha mosadi e monyenyanane a entse. O n’a fete, a re, “Ke dumela ho Monna enwa.” A e na le phallo ya madi, mme yaba o re, “Ha nka ama qola ya seaparo sa Hae, kea dumela nka fodiswa.” Na ho jwalo?

²⁴⁷ Ka baka la tumelo ya hae, tsatsing leo, Lengolo le ile la phethahatswa. “O tlamehile pelo tse robhileng, ho fodisa ba kulang le ba holofetseng.”

²⁴⁸ Yare ha a ama seaparo sa Hae, mme a tloha a fihla a dula fatshe, A reteleha mme a re, “Ke mang ya Nkamileng?” O ne a ka tseba jwang le ka mohla, hara letshwele leo le hatellaneng la batho, mohlaope makgetlo a mashome a mararo ho feta ba le

teng mona bosiuang bona, dikete tsa bona? O e tsebile jwang? O ile a re, “Ke mang ya Nkamileng?” A sa rialo feela hore etle’be o buile; O buile jwalo hoba e ne e le nnete. Mme A re, “Ke mang ya Nkamileng?” Mme A retolohela hantle teng mme a bona mosadi e monyenyanane, moo a n’a dutse kapa a eme, e leng hore o ne a le maemong afe, a mmolella hore phallo ya madi e fedile.

²⁴⁹ Eo e ne e le Jesu maobane. E sa le Yena kajeno. Na le dumela hono? [Phutheho e re, “Amen.”—Mong.]

²⁵⁰ Ha ke o tsebe; Modimo o a o tseba. Empa o na le mahlaba lehlakoreng la hao, a o tshwenyang. Ho nepahetse. O dutse mono o ts’o rapela ka hona. Na ke o sele ho wena, mme re basele e mong ho e emong? Ema, haeba ho le jwalo. Ha ke o tsebe. Ke monna *enwa* ya khoneng mane hantle, thaka lena le letjha. Hape o tshwerwe ke mmetso o mobe. Ho nepahetse. O nts’o rapela ka hono. O ferekantswe ke ho hong ka hohle. O tla tshwanela ho tsamaya kopanong ka hoba, o le moreri, o na le ditlhophiso tseo loketseng ho di phetha. Hoo ho nepahetse. Ah-hah. O a dumela Modimo o tseba hore o mang? Mor. Mong. Smith, jwale o ka ya mme wa fodiswa. Jesu Kreste o o fodisitse. Tswela pele o ye kopanong ya hao; mmetso wa hao o ke ke wa o tshwenya.

O amme mang?

²⁵¹ Ho na le monna ya dutseng hantle morao *mona*; o a sotleha. O na le hlahala letshwafong la hae le letshehadi. Ha a . . . Ha a tswe mona. O kile wa ba mosebetsi wa morafu. Hoo ho nepahetse. Ke osele ho wena ka botlalo. Ha e le nnete, tsokotsa letsoho la hao. Hlahala e letshwafong la hao le letshehadi, mme o makhatheng a ho sehwa hang-hang. Na ho nepahetse? Ha o tswe mona. O tswa ka ntle ho motse. O tswa Virginia. Ho nepahetse. O dumela Modimo o a tseba o mang? Mong. Mitchell, ho lokile, eya hae mme o phekolwe. Jesu Kreste o a o fodisa. Botsang monna eo! Ha ke eso mmone, bophelong ba ka. O ne a dutse mono, a nts’a rapela.

Kajeno lena Lengolo lena!

²⁵² [Moena Branham o furalla phutheho—Mong.] Mosadi ke *enwa* o dutse hantle morao mona, ka morao ho nna, jwaloka Sarah ka tenteng. O rapella moradi. Ema. Moradi ha a yo mona; o hole, moradi. Mme o tshwana le mohla mosadi e mong a n’a tla ho Jesu, yena ya n’a e-na le mosadi ya kgathatswang ke motemona hampe. Mme mosadi eo . . . ngwanana o tshwerwe ke motemona. Ha a yo mona. O tswa . . . Wena o tswa Carolina Leboya. O dumela taba eo? Mme hoo ke nnete, ha ho jwalo? Mof. Orders, o ka ya hae. Ha o ka dumela ka pelo yohle ya hao, o tla fumana moradi wa hao a le jwaleka ha eo a fumanwe mohla Jesu Kreste matsatsing a fetileng, ha a n’a re bo phekotswe.

253 Kajeno lena Lengolo lena; pontsho ya Sodoma, pontsho ya Peo e kgolohadi, pontsho ya kereke ya nama! Kajeno lena Lengolo lena le etsahetse hara lona. Na le a e dumela? [Phutheho e re, "Amen."—Mong.]

254 Na le tla Mo amohela hantle hona jwale jwaloka Mopholosi wa lona, mophekodi? Emang ka maoto a lona, e mong le e mong wa lona, ka ho re, "Ke amohela phodiso ya ka. Ke Mo amohela jwaloka Mopholosi wa ka. Ke Mo amohela jwaloka Morena wa ka." E mong le e mong a eme ka maoto a hae.


Kajeno lena! Mamelang, metswalle.

255 "A bala Lengolo, le ho kgutlisetsa Biblele ho moprista, mme," ho re, "mme mahlo wohle a batho a tsepame hodima Hae. Mme yaba O ba hlaba ka mahlo, le ho re, 'Kajeno lena Lengolo lena le etsahetse.'"

256 Ke badile Lengolo, le ka bongata ba dikgodiso hore re letsatsing la qetelo, molokong o tlang ho bona Jesu Krete a kgutlela lefatsheng. Mme ke re ho lona bosiueng bona, hape, kajeno lena Lengolo lena le etsahetse mahlong a lona.

257 Lona ba Tucson, lona ba California, lona ba New York, dikgokahanong tsena tsa mohala, kajeno lena Lengolo lena le etsahetse le iponela.

258 A re thabeng re nyakalleng, hoba Lenyalo la Konyana le atametse, mme, (Monyaduwa) wa Hae, Monyaduwa wa Hae o Itokisitse.

259 A re phahamiseng matsoho a rona mme re lebiseng tlotla ho Yena, lona batho bohle. Modimo a le hlohonolofatse. [Phutheho e tswela pele ho nyakalla le ho rorisa Modimo—Mong.] 

Kajeno Lena Lengolo Lena Le Etsahetse, Vol. 6 No. 4
(*This Day This Scripture Is Fulfilled*, Vol. 3 No. 8R)

Molaetsa wona o tlišeng ka Moena William Marrion Branham, o rerilweng tshimolohong ka Senyese mane ka Labohlano mantsiboya, Hlakola 19, 1965 Parkview Junior High School, Jeffersonville, Indiana, U.S.A., o ntshitswe mabanteng a kgatiso a makenete mme o ngotswe o sa kgutsufatswa ka Senyese mane. Phetolelo ena ya Sesotho sa Borwa e phatlaladitswe ka 1998 ke ba ha:

VOICE OF GOD RECORDINGS
P.O. Box 950, Jeffersonville, Indiana 47131 U.S.A.

Temoso Ea Tokelo Ea Qopitso

Litokelo tsohle li babaletsoe. Buka ena e ka porintoa ka porintara ea lelapa molemong oa motho eo kapa ea abjoa, ntle ho tefiso, e le thepa e jalang Evangeli ea Jesu Krete. Buka ena e ke ke ea rekisoa, ea boela ea hlahisoa ka bongata, ea manehoa leboteng la website, ea bolokoa ka tsela eo e ka boelang ea ntšoa, ea fetoleloa ka lipuo lisele, kapa ea sebelisoa ho qela matlole ntle le tumello e ngotsoeng ea Voice Of God Recordings®.

Ho fua boitsebiso bo bong kapa bakeng sa thepa e nngoe e ka fumanoang, ka kopo ikopanye le:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org